

峰溪先生集叙

曩予奉史職無狀謫推維揚屬邑興
化先大父宦游地以故徃尤數延問
父老攷鏡先哲則人為予誦孫令鋤
強抗節事曰興故善地其梗化蠹俗
挾官吏短長自巨豪徐某始其黨蓋
十餘家根盤蟻附官吏噤不敢出氣



無論小民令下車廉知之悉擒置之
法民始得安枕而卧然令亦坐是為
嘆者擠不得為京朝官僅陞府同知云時
武廟中葉巨璫張銳用事豪黨通重
賄妄訴令事下御史懾巨璫勢依阿
其間令移書讓之御史為謝病去事
竟以得白予聞而異之曰世乃有剛

毅若斯人哉及論其姦則所謂孫令
者固吾鄉先達峰溪翁也比予再轉
而為南刑曹郎時大司寇蜃川孫公
實峰溪翁元嗣冲襟碩抱天挺人豪
內介外和春溫秋肅予曰峰溪翁之
風其在茲矣議政之暇縱言興化時
事暨峰溪翁種善政泚行之詳予日

得聞所未聞大都荆川先生所勒墓
銘其實錄也久之大司寇滿考

朝廷推恩贈峰溪翁如其子官龍章
共奕輝映舊京一時縉紳大夫靡不
侈峰溪翁之榮羨司寇公之孝又以
信天之報善人不在其身在其子孫
不毫髮爽也司寇公暫釋機務歸憇

林皋檢閱先世遺書得峰溪翁詩若
文草如千泣而曰吾父讀書為文不
作無益語願獨喜吟咏所遇閒適登
眺無聊不平一寓諸詩稿當日富以
其奔走萬里輒斃失之正德辛巳以
後所存僅止此然吾父偃蹇仕途釋
褐三十年不越五品清苦一節家無

餘財所遺以詔後人者清白之聲與
斯文耳予小子忝竊餘慶其敢忽諸
乃手錄授梓而命謨序予既受讀卒
業嘆曰觀翁之作得翁之大何敢以
詞人目之孔子曰吾未見剛者而又
以有慾為無剛周元公司理南安與
轉運使爭死囚獄至投告身決去就

已而判合州部使者信讒臨之甚威
元公超然卒見知遇元公之為吏剛矣
迺其作易通則以無慾為聖學之要
有旨哉其言之也峰溪翁仕不阿世
與元公同至讀其詩沖淡純雅直寫
胸臆若大羹玄酒渾金璞玉而淵然
之味油然之光咀之而愈深過之而

愈揚也文疏暢條達根極理要論事
亶詞必達意光明爽朗類其為人其
上御史一書偉詞正氣星斗芒寒至
今讀之猶令人髮上指冠也其褫小
人之鬼無足怪者且當強仕有為之
年而恬愉靜退往見之篇什視世之
榮利奚啻鷓鴣之於腐鼠翁蓋無慾

人也宜其崛起元公之後為吏而剛
一人而已不其盛歟此所謂翁之大
者非嘲風詠月之謂嗚呼士多患失
習尚脂韋利方為圓甘名巧宦求如
峰溪翁其人景星鳳凰世不恒有聞
其風尚足以廉頑起懦矧茲著述乃
其性術之流精神之運者哉是宜家

傳人誦為仕學著龜非獨孫氏之寶
藏已也而司寇公作求先德服念前
休既寵褒以功烈俾有榮施復表章
其遺編垂之永久真孝子事可為世
範法得並書之抑予先大父與翁生
同時學同門予視翁大父行也且於
司寇公為故吏誼何敢辭獨以不工

之文附名不朽則誠有餘幸焉身

萬曆乙亥夏四月既望

賜進士出身朝列大夫南京國子監
祭酒前翰林院

國史編脩通家晚生姚弘謨拜手書



峰溪集卷之一

籩豆歌之以燕賓友也

籩豆既儷穀核既陳
速我賓友式燕于亭
其穀維何維筍及蒲
維豚維豸孰云孔多
其核維何維栗與梨
維棗維柿旨酒秉壺
酌我賓兮飲我友兮
獻且酬兮其樂只且

籩豆四章章四句

擬古

魯叟欲無言玄天本淵默大道妙無形至
人啓靈測河圖闡其幽洛書準其則六經
沛江河百家紛浙瀝異端彌近理稂莠混
嘉稷巖巖養氣翁仁義闢邪慝卓哉董與
韓繼起力羽翼有宋文運昌濂洛諸儒出
太極開羣蒙人文日昭晰吾道麗中天萬
古無剝蝕

顏子事四勿曾子勤三省古人志實學夕

惕勵夙警心齋日乾乾王翁時喚醒百邪
莫與侵萬理昭明鏡卓爾見道真一貫卽
妙應道統賴以傳千古開迷徑思孟代相
承濂洛紹其正學自明而誠希賢可入聖

偶述

牕開見遠岫力穡向東臯古人志丘壑富
貴輕鴻毛心虛忘物我慮澹淨塵囂勢利
何爲者千古高簞瓢

山海集卷一
二
次石岡大巡阻雨定西嶺

炎荒事行役游塵眩岐路鳴雨暗前山飛
瀑垂練素復磴亘懸崖艱虞駭登顧危嶺
墮猿聲悽惻良可惡上淖道且脩山深景
欲暮睠茲行路難徘徊洱東駐去住何定
踪虧虛有成數中夜起聞鷄憂勤不能寤
星輶下南滇豺狐紛避路按部揚濁清沉
幾析玄素浩氣薄霜空山嶽挫盼顧直道

振臺綱旌別彰好惡州郡役多蠲父老歌
來暮風裁萬里持仁雨隨車駐滌蕩淨邊
塵運泰符元數炯炯法星懸貪墨恒警悟

毘陵聞蟬有感

玄蟬鳴高柳白露橫江涯節物忽復易觸
景增傷悲人生天地間諒匪金石姿胡爲
甘苦辛遠道徒奔馳會須謝塵鞅笑傲東
山谿行止無牽柅世路奚是非緬懷縻祿

士完名世所希浮雲視簪組誓節古人齊

四月十七晚觀竹有感

有竹方遠俗俗人不知竹竹勁比君子人
俗同朽木顧竹尚虛心在人胡多欲賢哲
戒盈滿愚昧每傾覆緬懷名利客知足自
無辱

夜坐

秋風清兮秋月明天地氣肅鴈南征斗宿

芒寒光錯落銀河耿耿白露橫寒蛩啾啾
喧四壁庭院忽驚飛螢入佳人夜半搗秋
衣天涯遊子關山隔秋郊揜落景色微吳
江楓落葉亂飛騷人感物牽吟思幾度臨
風欲賦詩

樵漁歌

平生性僻樂山水山可樵兮水可漁有時
携樵入山徑深林斤斧各自持懸崖丁丁

聲出谷侵雲陟嶺伐高枝有時侶漁泛湖
曲操帛煙波競相逐有時小艇泊蘋汀浩
歌滄浪濯我足乃從而歌曰漁兮漁兮何
所欲得魚野沽泛醺醪顛倒醉眼包乾坤
處世何榮更何辱又從而歌曰樵兮樵兮
奚所樂友麋鹿兮伴猿鶴歌白石兮傲青
山朝雲谷兮暮巖壑

會心齋東偏隙地可丈餘圍垣築臺

引泉壘石樹以長春海榴花蒲竹
嘉草雜植焉暇日靜對景與心會
序而賦之

瑟瑟涼風吹紫竹涓涓流泉浣塵俗海榴
迸蓋照檻明月桂相鮮花炫目錦川疊翠
真玲瓏太湖峭石氣勢雄矧碑並峙勢倚
角隨物賦形何神工菖蒲青青貫冬夏瑤
草琪花懸石罅小山如畫峯叅差有仙奚

必論真假

涉園見橘可愛遂口占

我愛橘枝葉四時長鬱鬱滿林秋老黃金
懸剖食香甘勝膾炙菊英蓮花清且妍爭
如此橘味更偏淵明濂溪本賢傑氣味相
投各自憐牡丹富貴愛者衆一時繁華真
覺夢橘兮橘兮耐歲寒世人紛紛豈知重
小隱亭東皆鳳尾竹下鳳仙花叢生

見而賦此

鳳仙花鳳尾竹鳳兮五采散爲花鳳兮兩
翩翩成竹花絢日兮名仙葩竹舞風兮辟
塵俗兩間物類何紛紜花竹緋翠擬鳳群
虞廷來兮昭盛世萬古丹青徒寫真吁嗟
靈鳥不世出時哉托物顯靈迹花兮竹兮
爲傳神安得靈鳥鳴岐世道淳

咏長春花

長春花長春花四時不斷春無涯由來得
氣偏且厚秋不凋兮冬亦茂牡丹芍藥春
叢叢蓮開夏兮菊秋榮千葩萬卉隨時發
爭如此花月月紅歲寒後凋惟松柏柯葉
青青無改易羨汝芳姿亦耐寒獨與老梅
爭春色

詠櫻絡松

櫻絡松櫻絡松翠縷煙籠輕颺風初疑滄

峰溪集卷之二

吳江道中

國家圖書館, NATIONAL CENTRAL LIBRARY, TAIWAN, R.O.C.

江楓葉滿棹澤國水連天
疎柳寒蕪外蒼山夕照邊
湖光連野色寒鴈落晴川
蘋末涼風起秋帆帶月懸

蘇門夜泊

舟泊吳門外津亭起暮煙
鐘聲來遠寺月色照前川
簫鼓樓臺迥江天風露偏
長吟

清不寐興入斗牛邊

感秋

蕭瑟秋風至涼生節物更堪前黃葉滿天
外白雲橫野杵千家動澄江萬里明歲豐
民自樂百穀倍秋成

菊莊

秋色滿山莊東籬菊正黃地偏隔塵世俗
遠自行藏採菊閒携杖食英漫引觴標同

霜下傑人物共流芳

書桐鄉孫大尹卷

當代推循吏如公有幾人守官真似水蒞
事競稱神治行追三異民風復古淳政成
旌卓茂漢史有遺名

東野

新豐有高士卜居東野偏耕鑿安吾分煙
花別一天

渾無累昌陽自引年

秋日倚樓

木落蒼山靜雲寒碧樹秋風塵悲海內鼓
角動邊愁野曠孤城迥江空片雨收登臨
頻悵望天外一身浮

過淮水漫有感

淮水兼天湧河流漫地行江湖萬里客憂
樂百年情旅思秋風動鄉心白髮生何時

謝塵鞅長嘯泛滄溟

香河縣懷鄉口占

親朋隔海內時序憶鄉關世路催霜鬢風
塵抗舊顏乾坤容我老歲月爲誰閒何日
滄江畔忘機鷗往還

丙戌六月自灣入京道經通州永明
寺避暑小憩殿角東北隙地僧人
布席薦茗涼風徐至煩暑頓消坐

久殆欲忘去因賦此以識歲月云
野寺延征騎涼風濯短纓殘僧勤飲茗老
樹不知名藤覆山房古雲和梵磬清坐忘
塵外地去任兩關情

丁亥孟冬十六日自衡水至深州

冬行荒野道縱目物華微路入深州杳舟
行淺碧遲牛羊閒自牧烏雀靜相依燈火
山城暮霜空月滿衣

孟冬十七日巡行至東鹿夜坐無酒

口占

歲月南巡暮關山馬獨來酒杯無分把客
抱向誰開對影疎燈淨鳴雞淡月催題詩
紀行役短興句難裁

孟冬二十五日南巡廣平府至任縣

郊外有水自南北注淺碧可愛因
憶溪南佳號率爾口占

高士溪南隱乾坤自一方蒼山碧水畔沙
樹海鷗鄉樵唱聞斜谷漁歌起夕陽生涯
寄風月高興咏滄浪

十二月二十九日過廣平府臨路驛
驛近有冉伯牛祠世傳伯牛有瘡
疾曾浴於臨路湯池卒葬此地今
墓在焉永年縣春秋祀之途次紀
咏以致景仰先賢之意云

道出臨路地伯牛廟貌奇傳言因癩疾曾
此浴湯池今古名猶在郊原墓尚遺閔顏
齊德行千古士人師

戊子十一月二日南巡至內丘察院
廳後古栢雙植于庭盤鬱競秀愛
而奇之賦此

雙栢何年植亭亭翠蓋聯根同天地老節
並歲寒堅溜雨霜皮古團雲黛色鮮明堂

資柱石萬木意誰先

長至寓曲陽察院因憶兄弟南北異

處持杯悵然有感

匹馬來東魯曲陽遇一陽乾坤開令節雲
物喜書祥野柳傳春信官梅冒雪芳掌中
杯獨把愁見鴈連翔

冬十一月廿二日自河西渡水過寶

坻道中偶成

寒郊驚歲晚野望淨煙沙岸雪晴含凍河
冰晚渡車游塵官道路蔀屋野人家暝色
高城暮歸鴻伴落霞

湯泉池

水火相融液地湧泉如湯元氣開橐籥神
功發秘藏涵空清見底似鑑碧浮光偶爾
來池畔相看塵慮忘

十二月朔日自三河過通州公館見

郭道長雨晴題壁因次其韻

江山盡凝秀城郭半含晴
斷雨懸空碧濕雲抱日明
千林開霽景萬壑落泉聲
廣野浮塵淨乾坤入望清

道中遇雪

同雲荒野合密雪亂山飛
萬里塵氛淨千林冰柱垂
古年豐燕麥潤物發天機
入地蝗千尺誰云造化私

過太平觀

蓬萊方外地臺殿肅陰陰
丹井煙霞古琳宮歲月深
經符承浩劫笙磬發仙音
到此塵凡隔忘言太古心

過孟良寨山有荒城一座自漢時建

寨蓋宋將所築也

城自炎劉建寨從宋將遺空
名存異代廢址憶當時
剩水流荒徑殘山臥漢碑
英雄

爭戰地落日草淒淒

道中見野池白蓮

柳城蓮半白野植漫亭亭
幹濯連漪淨香浮蘭芷清
淺粧疑露碧翠蓋倚風輕
雅調同君子繁葩浪得名

過關索嶺自麓至巔盤曲九十九灣
石磴八百餘級山半有止亭嶺石
堡城一座

萬里雲南路三年今始歸野梅渾破白官
柳半垂絲嶺峻盤空險城尖疊石危邊疆
據形勝天畔控諸夷

桃川

路入桃川境川流泛落花仙源自秦晉丹
洞闕煙霞風景四時別松筠一徑斜雲深
堪避俗幾度欲移家

長沙山行

遲日三湘路春風萬里軺氣融山色麗花
密鳥聲嬌麓篠臨官道村扉對野橋風光
時極目未惜馬蹄遙

過盤江

兩岸山環翠一江水湧藍怒濤晴噴雪宿
嶂晝昏巖候吏依沙際津亭駐客驂江畔
風輕舟利涉度馬向雲端

過辰溪縣次院壁韻

林霏開野色雉邑翠微間城郭多臨水樓
臺半倚山泉穿雲竇細路逐碧溪灣鐘鼓
鳴仙洞洞有石鐘石鼓故云遺音可復還

應州道中邊境雪晴一望無際口占
肩輿侵曉發積雪霽霜天百里空村落千
山控朔邊荒城臨戍堡沙漠靜烽煙
聖世真無外乾坤屬萬年

人日過錢甥茂孝儀郎歸途值雪

同雲連海嶠密雪晴江天訪戴誰移棹尋
梅骨欲仙灑空聲淅淅照野色娟娟三白
豐亨兆還看大有年

三月十四日至杭十九日陳秀夫請

遊西湖

湖山佳麗地萬象發天真煙柳六橋色野
桃萬樹新天開圖畫景人樂太平春歌舞
無窮日青山應笑人

二十一日沈五山復請遊西湖同舟
艤六橋登岸憇桃樹下酒酣偶云
六橋流水遶孤山因足成之同遊
者潘東園果齋蔡雲村也

短棹泛湖西六橋煙樹迷兩峯拔地峻三
竺與雲齊深洞煙霞古落花春鳥啼翠微
懸傑閣登覽覺天低

已亥冬咏池西老梅

老榦冰霜古松篁定晚交亥冬報春信冷
葢發寒稍瑩潔欺崑壁清芬避野桃逋仙
神與會歲歲托詩招

賀梅池節推

政善因民利平反見至仁憑將三尺法散
作十分春昭代推循吏如公復幾人佇看
徵詔下風采振朝紳

壽潘厩南六十冠帶

誕值清和景年侵六十強冠裳耀梓里蘭
桂儼成行笙鶴羣仙集歌鐘綺席張新詩
祝遐算上壽歲稱觴

小隱亭閒坐

綠野開亭榭幽偏隔市塵水流花徑淨雲
暖草塘春采擷酬芳興涵嚙味道真悠然
成獨樂高臥碧山雲

病中遇春分惜春光之虛半也有感

口述

問訊東郊路芳村景最幽煙花迷野望高
柳拂雲稠桃李酣春色溪山擬勝遊三分
春已半心賞若爲酬

三月十四日舟泊鴛湖

湖淨碧粼粼天空一鑑明遊人青雀舫魚
釣白鷗汀樓閣侵雲出溪山入座清扁舟
傍湖曲風送棹歌聲

三月廿日復過鴛湖

澄湖涵遠岫叢竹覆長汀野色煙浮翠風
情柳送青亂山開夕照浴鷺逐星萍歌罷
滄浪曲蛟龍水底鳴

燕敘亭北隙地方丈餘葺蔽外垣布
磚石中置象空圓缸崑石小山一
座雜植草樹平浮水半寒碧瑩徹
蓄鮮鱗三四尾活潑沉浮天機流

動晴空照映宛然小景畫也燕坐
靜觀心超物外有悠然自得之趣
適雨初霽景與心會戲寫山水短

句

雨霽山流翠風微水涵山倒影山
映水浮岑矗矗山孤秀泠泠水瀉音水山
異流峙仁智樂同心

喜睡口占

病去頻思睡精神漸似前援琴消俗慮玩
易見先天風月渾無價光陰寄短編塵心
渾洗盡何必問神仙

二月三日奉同伯兄一槐及偕潘子

溪南甥汝節往觀雅山之勝是日
景物明熙風日柔麗登眺之餘殊
覺目開以豁積時俗況頓掃于孤
峯絕壁之外不可無言以謝山靈

薄暮歸舟漫賦

久負山靈約山靈待我來仰天發長嘯俯
海豁塵懷萬井如鱗次九峰似劔排勝遊
無限興把酒共登臺

又

海畔古叢林松風萬壑吟嵐浮山欲動潮
湧地疑沉濱海孤城戍沙村隱樹深振衣
凌絕頂空翠浣塵襟

四月二日舟次鴛湖

小艇依湖曲湖光入座清海鷗翻碧浪沙
鳥浴蘋汀山色無邊畫煙波不盡情最憐
春景暮啼老杜鵑聲

七月廿四病愈

秋風蘇病骨涼雨濯煩襟避俗營幽地迎
寒起暮砧藥囊看漸減書帙喜重尋搖落
江楓候空山萬壑吟

再咏溪南

盛溪有高士結屋水之陽翠竹沙村路蒼
山煙水鄉天光涵淺碧雲影落芳塘風月
生涯事乾坤自一方

正月二十八日雪霽泊舟南湖

春意滿郊原湖天景自妍野梅臨水岸津
柳翳村煙古寺藏深壑朱樓映碧川東風
吹暮雨汀草亂漁船

觀竹口占

蕭蕭數竿竹亭堦掃塵俗涼陰屯翠雲膩
粉灑清馥風動恍翔鸞煙疑訝鳳宿清氣
逼人寒不愧簟簞谷

正月二十九日春雷至再寒且甚呼

酒口占

畏寒須釀酒掃雪且烹茶三白真呈瑞千
林漫綴花風光遍海邑詩思屬誰家策蹇

饒清與豪吟待物華

咏翠巖

乾坤開勝地今古顯山靈高聳仙巖秀平
懸華盖形彩雲攢片片絳萼匝層層聯絡
垂珠壁玲瓏繡綴瑩丹霞蒸麗色紫電發
精英雕飾真天巧神奇匪匠成峭山前對
峙古洞左偏嵒麓篠環岸翠谿泉遶澗聲
南飛雲閣峻西照月潭清鴈蕩誰爭長桃
源可擅名景誇天下勝奇絕貴陽城仙界
三山並清風雨腋生登臨塵世隔莫漫羨
蓬瀛

二月十一日病起觀物有感

臥病經時久書齋忽見春草披風秀發梅
破雪精神巖畔蘭抽甲盆池水躍鱗筍寒
微迸玉石暖欲生雲叢檜森交翠幽蒲清
絕塵化機真觸處物物藉陶鈞

雪舟聯韻

此詩作於正德戊寅近於故戚家詢得之續附

避漏頻移席

墊

衝寒數舉杯光搖銀海眩

璽

醉合玉山顏長興還燒炬

淵

相思擬寄

梅遲回渾不去

時雍

風雪落江湄

墊

和

扁舟坐寒夜短燭照深杯密雪凌風勁驚
濤觸岸顏壯懷頻把酒逸興欲尋梅憂樂
江湖客萍逢淮水湄

古城道中

雪積迷狐兔雲寒嘯狢猿高城銜暮景亂
水入孤邨荒隴牛羊下空林鳥雀喧停車
宿山館燈火近黃昏

舟次淮河龜山

宿舸邊淮次山邨春事賒野桃臨水短津
柳傍風斜草暗都梁路鷗明釣渚沙自憐
非少壯撫景惜年華

南旺聞風雪阻行有感

朔吹吼山谷同雲蔽野天山城三尺雪茅
屋幾家煙遠岸封條樹危檣豐浪船擁爐
燃宿火呼酒祝豐年

舟至穀亭河水登陸見田潦民貧有

感

寒城衝曉發極目野無邊齊魯山連脉溪
湖水遶田空邛邛惟鳥雀落日靜人煙那見

流亡者吾儕誰爲憐

晚宿廟道口

歲暮遠行役寒深路欲迷亂山侵地出遠
樹接天低高岸欹輪鞅危橋信馬蹄荒城
昏問舍涼月半羈棲

穀亭阻冰口占

層冰膠彩鷁凍馬着空鞭迢遞淮陰道蒼
茫歲暮天世途何偃蹇吾道自周旋久客

看囊罄衝星一劍懸

桃源途中口占

遠道驅馳日冰霜歲暮時
寒山無落木老樹有垂枝
湍減添沙面風高振地維
數家鷄犬靜落日亂鳥啼

徐州道中

遠道經徐泗山川感慨中
歌風王業定戲馬霸圖空
古道遺碑在荒臺宿草蒙
英雄千古恨落日水流東

峰溪集卷之三

正德辛巳

皇上登極朝見感遇有述

九五龍飛御八荒歡呼朝野頌虞唐江河
積垢新沙汰鼎鼐鹽梅舊俊良皂蓋專城
推召杜青雲要路有王陽太平氣象忻遭
際勲業驚看兩鬢蒼

辛巳七月旣望過徐彭城自古險固

其地三面被山岡巒圍合獨缺其
西其城三面阻水沛汴泗交流其
北城南有戲馬臺古沛有歌風臺
豐縣有朱陳村皆舊迹也宋熙寧
間河決澶淵水及城下者一丈八
尺水皆城際出子瞻廬於城上率
民與城存亡水大至而民不漬及
水旣涸卽城之東門爲大樓謂上
能勝水室以黃土名曰黃樓子由
爲之賦徐人至今傳之

彭城險固屹天關山水縈迴三面環水接
江淮偏北阻山連齊魯獨西慳朱陳村古
流風遠漢楚臺荒碧蘚斑日暮黃樓弔遺
跡邦人千載仰蘇仙

癸未歲元旦試筆

東風吹暖凍初勻候管飛灰斗建寅獻歲

節更嘉靖曆占年重見太平春華夷共荷
乾坤德朝野驚看景象新瀕海小臣終禮
制嵩呼久負後簪紳

病起偶成次友人韻

病骨初輕步軟沙青山深處欲移家時和
旋試宜春服世治那聞欵塞笳林樹着煙
浮野綠溪流帶雨入江斜清平景象身無
恙吟倚東風看落花

九日登高次蔡巨源韻

登高何處菊盈金風景清竒負賞心遠水
兼天澄素練亂山障海碧千尋江雲浮白
明楓葉巖竇飛泉戛玉音撫景獨慚雙短
髻悲秋幾度發長吟

兗州道中

匹馬重經此地過乾坤古意北來多井田
遺迹商周制雲澤流芳洙泗波山接魯齊

宗岱嶽地分滕薛界沙河年來恠我長爲
客無補

清朝髻欲皤

青縣舟中次韻

遊人混逐馬蹄忙秋入郊原野色蒼萬里
澄江明素練一天涼雨洗炎光孤臣見日
常懷袞遊子看雲憶進觴君父未酬忠孝
志獨慚衰髻客他方

磚河舟中晚行

雲水蒼茫欲暮天鴈拖寒影下長川山光
射日開殘照野色隔溪昏暝煙別浦釣間
漁火亂小橋人集酒旗懸關河爽氣生蘋
外風滿疎林亂晚蟬

閒述

自笑人生一夢間紛紛車馬走塵寰身須
避俗心方靜道在謀安跡便閒五鼎一瓢

誑貴賤大寒溽暑互循環年來解得盈虛
理富貴浮雲任往還

七月八日舟次青源驛

江天曉角動高城耿耿明河淡欲傾山色
入簾開霽景江風鳴葉落秋聲無拘似我
消棋局混俗由人擁旆旌滾滾浮名成底
事丈夫忠孝任平生

感寓

薄宦浮名歲月虛百年懷抱竟何如豪雄
少日揮談塵疎懶平生愧曳裾五色擬成
萊子服萬籤空羨鄴侯書長懷勲業頻看
鏡搖落秋風兩鬢疎

秋日舟過虎丘順風有作

風急吳帆暗浪喧秋聲萬樹滿乾坤浮屠
聳壑山藏寺漁屋臨溪水到門波落洞庭
賓旅鴈雲蒸海嶠嘯孤猿自來澤國知秋

早爽氣橫空遍海村

過錫山

圖畫天開地聳山峰巒峭拔互迴環宿嵐
滴翠催時雨飛閣流雲繞盡闌洞石陰陰
臨碧澗泉流脈脈瀉雲間有山名錫原無
錫今古何人自浪傳

七月廿五日道經丹陽望南都

金陵佳麗帝王臺萬里江流自蜀來虎踞

龍蟠鍾王氣黃旗紫蓋逼三台六朝流恨
浮雲散千古遺悲宿草衰天佑

高皇開日月華夷混一統埏垓

觀金山志偶成

憶到金山眼界開振衣獨上妙高臺三江
水色接天碧萬派潮聲動地來北固樓臺
浮蜃氣廣陵城郭倚雲隈塵心洗盡超凡
界吞海亭空隘九垓

有感

宦海何人見獨先飄然物外乞歸田市朝
軒冕今無夢丘壑煙霞宿有綠碧水青山
塵外地鳥飛魚躍靜中天風波世路多傾
覆擬向江河把釣竿

咏竹

分得瀟湘竹數叢拂雲老幹自凌空煙稍
直放三千丈露葉紛敷幾萬重時向澗泉
鳴翠玉頓令頑懦起清風忽驚白晝雷霆
震爲報湘江起蟄龍

漁隱次韻

放浪乾坤高世士棲遲煙景自囂囂公卿
不似桐江樂箬笠還同渭水豪萬頃鷗波
橫釣艇一竿風月讀離騷清湘幾疊漁家
傲淺水蘆花風任飄

暮春泊鴛湖

風光日轉催春暮
官柳垂堤綠萬行
山色空濛連野色
湖光瀲灩接天光
漁歌欸乃聞湖曲
樵唱咿呀起夕陽
何處高樓橫短笛
數聲清吹落滄浪

立夏

首夏清和覺眼明
流雲閣雨弄陰晴
湖涵霽色接天碧
山染嵐光匝地青
煙樹萬家侵野闊
鷗鳧千點浴波輕
幾迴撫景饒吟

興極目江天無限情

感秋

碧空萬里氣蕭森
楓樹千林落葉深
景物關情動秋思
山林引興發長吟
靜中自得乾坤趣
海內誰同風月心
俯仰古今人易老
笑歌莫待鬢霜侵

同寅祝藩叅王兵憲林憲僉會請楊
大巡遊西洱海予是日適至大理

同登浩然閣次韻

天畔騰雲海氣浮，光搖虛閣渙澄流。
獨慚遠道風塵客，何幸同登李郭舟。
映水樓臺銜暮景，匡時人物壯仙遊。
衰予萬里雙蓬鬢，幾憶蓴鱸水國秋。

六月既望西巡藩臬諸公郊餞于總
府池亭雲崖金都閘復載酒送至
滇海次果菴謝藩叅韻

郊西一逕入煙蘿，十里平沙帶淺河。
亭枕野池環水竹，坐分綺席麗笙歌。
風生綵鷁乘流急，酒盡青山落照多。
聚散無期重離別，碧鷄名山西去酒顏酡。

中秋前一日宴會楚雄尊經閣僉憲
味江倡韻預席者藩叅靜菴兵憲
東峪文宗宜菴及予也

賓筵藩臬臨清宴，閣繞松杉浮翠煙。
經籍

百年崇楚塞文風萬里振南滇古今人物
推中夏南北衣冠共一天地迥凭高發新
興酒闌東望月初圓

次石岡楊大巡書大理行臺韻

碧鷄金馬二山名切空蒼峻拔羣峰鎮遠荒
並峙乾坤青嶂合相高氣勢碧雲涼名山
造化鍾靈秀重鎮安危仗俊良邊徼封疆
歸一統輿圖萬古仰

高皇

重九自西巡回省經太華山麓度滇
池

露冷蒹葭秋水清孤帆東下一舟輕滇池
波撼千山影華岳風吟萬壑聲六合浮涼
天地肅重陽把菊古今情那堪浪迹逢佳
節綠酒相看誰對傾

過盧溪郵亭中火次壁間韻

境入盧溪山四圍西來山勢自天開峯尖
切漢空懸碧山名有湍迅喧灘地隱雷江
路春深飛弱絮沙村雪盡見殘梅短郵炊
午成孤坐呼酒臨風漫舉杯

早發界亭驛次東塘毛中丞韻

曉歷征途霧欲迷衝寒迤邐界亭西亂山
落木驚秋老斜日哀猿何處啼路入岡巒
疑地盡雲連野樹覺天低霜風萬里勞行

役納納乾坤信馬蹄

過關頭嶺

關山晴度碧氤氳隔嶺猿聲動客聞百折
幽泉斜入谷千盤危磴曲穿雲崖懸蒼檜
龍鱗合峯切青冥鳥道分吳楚乾坤半踪
跡海天極目倍傷神

道經桃川訪煉丹臺仙人洞有感卽
古桃源也

靈源別是一乾坤有客尋真此避秦陸海
浮沉幾今古溪桃開落自冬春丹臺煙冷
仙踪杳玄洞雲深瑤草新路入煙霞人境
外亂山環翠隔風塵

九月十九初冬日也道出貴州偏橋
西三十餘里有地曰東坡書院士
夫來往者率駐節坡居叢山長谷
間龍從鬱秀檜竹交加寒泉鳴澗

聲徹空洞上有雲泉閣西偏則月
潭寺也坡後有山曰翠巖形如華
蓋廣可數尋深半而崇倍之石勢
玲瓏真若朶雲片玉聯絡映帶疊
翠流丹天然雕飾莫可名狀前俯
奇峭二山誠東偏古洞深邃可尋丈
平生奇觀勝絕景也登眺之餘塵
襟灑然漫賦俚句于左用識浮踪耳

倚坡蒼檜肅陰陰秀擁千峯紫氣深飛閣
流雲晴欲雨澄潭漾月夜浮金仙巖翠鬱
煙霞色泉竇清懸絲竹音塵眼頓開成勝
覽臨風幾度發長吟

道中次中丞毛東塘書院壁

霽雨秋山景色奇郊原清曠靜煙霏十年
岐路瀕行役千仞崇岡擬振衣野壑風生
隣虎穴霜空雲冷陣鴻飛寒城立馬千山

暮燈火松林半掩扉

三衢道中

壘嶂雲橫連遠樹澄溪練靜浴晴鳧春帆
遲日滄波杳官柳津亭彩鷁孤地近三衢
江接海界臨兩浙越通吳東南自古名山
水今古乾坤列畫圖

東鄉道中雨晴卽景

山翠欲流初過雨澗聲不斷遠通泉遊絲

縈絮浮煙靜芳樹交花照野妍雲暖江村
懸霽景沙暄鷗鷺浴晴川逐人春色渾無
賴啼鳥東風二月天

登恒山

恒山峻極衆山宗氣運坤維四岳通百代
帝王修祀典萬年香火報神功崇高冀北
分州鎮永奠雲中靜虜風絕頂躋扳塵世
隔上有集天高地迥思英雄

恒岳稜層聳衆山登臨心覺與天寬峯巒
半出雲霞外星宿平懸指顧間袖拂巖花
曳空翠泉通玄谷溢清寒探竒覽勝空塵
眼立馬西風幾倦還

冀北道中有感

浮沉陸海信乾坤浪迹天涯秋自春萬里
雲山異南北由滇南赴冀北百年身世幾風塵他
鄉物色悲遊子何處滄江着釣綸惆悵古

今人易老秋風高興憶吳尊

過黃河

九曲河流星宿源禹功疏鑿自龍門西來
積石三千里東赴滄溟晝夜奔高浪雲平
吞岳瀆驚濤岸坼震乾坤中州形勝環河
洛問俗猶多古意存

過太行

望入層雲見太行雄蟠千里鎮邊疆橫天

峻極賓中岳亘地延環控大梁雲霧氣蒸
昏洞壑峯巒嵐淨鬱青蒼擬尋盤谷當年
勝百世誰同李愿芳

過鴈門關次韻

羣峯鴈列壯天門切漢稜層千古存華夏
由來嚴界限朔方自是一乾坤邊庭雄鎮
天開險星宿平懸手可捫極目雲中連紫
塞秋風萬里靜胡塵

天長道中宿蓮塘公館

境入天長路更長
西風浙浙飄衣裳
天空露冷江雲白
楓落秋高山木蒼
地遍黍禾京國賦
風迴沼沚野蓮香
疎林候館延征騎
里巷蕭然自一鄉

歸德道中

冥冥途雨豁新霽
沙村暝色鳥將棲
秋滿郊原田遍粟
翠迷林壑樹交溪
流年物色驚時變
遠道風煙匹馬嘶
落日高城月皎皎
樵門寒角聲淒淒

延津道中

百里延津歲被災
野田秋黍半蒿萊
幸存酸棗垂垂實
猶賴棠梨處處栽
高葉下風開遠道
淡雲閣雨隱輕雷
長亭車馬爭馳逐
落日鄉關首重回

八月十七日秋雨初霽登遊虎丘山

寺次邃翁韻

雨餘緩步歷層梯石磴苔生不染泥梵宇
金光森法界海天霽色散虹霓虎丘形據
中吳勝劍石痕深半草迷幾度登臨縱吟
眺浮雲絕頂擬扳躋

偶成

悞入塵籠三十年秋風拂袖漫歸山虛名
浮世真成夢今是昨非茲破關丘壑煙霞
雙屐穩江湖風月百年間人間俗事休相
問且向煙波理釣竿

秋日泛湖

六合浮涼秋氣清五湖澄碧荻風輕帆懸
野艇煙波淨影漫千山一鏡平楓葉亂從
江畔落海鴻偏傍渚沙明天空野闊無邊
景醉月酬風萬古情

上元前三日徐東濱沈秦川移書趙

漸齋請觀十三迎燈予不果赴詩
以識之

海內觀燈同此夕武原燈會甲東南鰲峯
聳翠通星漢火樹明紅接炬蓮花市九達
風月夜絳樓十里綺羅筵連城簫鼓喧佳
節豐樂行看大有年

初春遇雪呼酒偶成五言餘興復續
四野同雲連海岱二儀騰六遍江津山川

極目俱生色草樹含英待發春凍雀苦寒
無意緒老梅偏覺長精神春條細柳窺青
眼一夜東風萬縷新

已亥夜夢春遊得詩三句偶鼠驚寤
止記花徑草香春杖履之句喜其
清婉因足成之

平林漠漠接平岡路入崇阿煙樹蒼花徑
草香春杖履雲關泉竇韻笙簧靈巖滴翠

詩脾爽霽壑蒸霞瑤草光山鳥不禁啼落
日漫遊歸咏興偏長

己亥春正月舟經硤石雨霽夜泊前

村次韻

短棹東風下石灣孤蓬歷歷指前山雨昏
海嶠沙村晚潮落春江野釣閒千仞浮屠
臨壑聳羣飛宿鳥帶霞還霽天空闊星河
耿倚岸春舟水月閒

期遊雅山二月望前五更夢餘偶成
翠薰綺陌草聯茵桃杏蒸霞欲燒林春水
孤村鷗泛泛野花一徑柳森森恠來百舌
枝頭鬧愛却清泉澗底音春色三分今已
半勝遊莫負碧山岑

遊雅山

晴峯積翠倚雲高此日來遊發興豪海畔
天風迴鶴馭沙村蔓柳雜緋桃踈松架壑

喧靈籟細草生香襲錦袍碧嶂丹崖塵外
路躋攀幾度不知勞

海上峯攢紫翠高磨崖新句欲爭豪晴郊
夜雨生芳草小洞春風開碧桃石潤苔花
沾屨杖煙霏嵐翠濕巾袍從來野性偏疎
放乘興頻過不憚勞

辛丑元宵見月

三五良宵月正圓千門佳氣接祥煙樓臺

處處酣春宴簫鼓家家慶舜年火樹陸離
輝午夜星橋掩映麗中天太平樂事還同
衆司牧應憐民磬懸

辛丑夏四月至杭僑寓畏吾寺舊主

僧剛崖及其徒雲村請遊西湖湖
光山色遠觀近眺俗況頓掃於孤
峯絕壁之外已而返棹中流逸興
浩發漫賦俚句識歲月云耳雲村

畫工山水亦喜吟詠至再索書嘉
其逃墨歸儒爲書之

三吳都會饒形勝兩浙鍾靈萃物華樓閣
翬飛臨翠巘湖山綺麗繞煙花雲霞三竺
神仙界梅鶴孤山隱士家身世恍遊蓬島
外飄然直欲泛仙槎

得孫志喜

北來書報已生孫聞報門庭喜氣盈家胤

百年真有托甲科再世賴相承懸知骨格
非凡器應是清奇擬俊英善積自來流慶
遠蒼天耿耿豈無情

三可亭閒坐偶成

白水青山映碧欄丹楓黃菊照蒼顏九秋
風月無邊興萬古乾坤靜裏看飛躍鳶魚
閒上下往來寒暑自循環爲山虧篲終成
阜學海非源須叩關

解冠林臥百年春，笑傲丘園樂自真。
日月無情催白髮，溪山有待著閒身。
滄江煙景歸漁父，綠野風光屬隱君。
已脫樊籠舒倦翼，回看富貴等浮雲。

九月九日登豐山峻嶺

層峯直上倚雲端，海闊山空縱大觀。
海限華夷環地脈，山連吳越覺天寬。
煙橫雉堞叅差見，風淨峯巒紫翠攢。
俯仰乾坤幾今古，百年身健且加飡。

古百年身健且加飡

園亭十詠小序

癸巳冬予自滇轉晉藩，少叅尋改僉晉
臬，領巡雲中，帶備兵，值邊警無虛日，季
冬幸大創虜寇，奏捷冀北，稍寧謐，公餘
每憶江南山水之樂，今吾故吾，何風塵
自苦如此，東望奮然乞歸，撫臺與

宗藩謂予宜於地方，慰留再且三越五日

遂行郡衛及父老槩具檄請留不能強
乙未春二月抵家性素疎懶苦俗累乃
拓舊圃西偏隙地構亭曰小隱以遊息
其間漫賦園亭十二章聊寄隱情云耳
匪敢謂言之成聲也

春一

倦遊塵海乞歸田松菊猶存三徑間小隱
亭成開綠埜百年身健老青山風花題品
饒吟興林壑幽閒任鬢斑心跡雙清無物
累看雲倚杖晝長閒

春二

芳亭幽枕野池濱翠繞脩篁帶碧茵林壑
雲深堪避俗煙霞地僻擬尋真靜看魚鳥
閒飛躍獨對溪山自主賓身世悠然塵境
外菊松三徑百年心

春三

竹蔽山亭砌隱苔幽棲地僻靜浮埃澗泉
漱石流花徑桃李成蹊帶水隈池藻漾波
魚自躍檻松團影鶴初回凭闌幾度閒吟
眺山月溪風取次裁

夏四

曲池清淺抱方亭面面牕臨碧樹陰疊嶂
倚雲青入座叢篁聳壑翠浮林幽閒對奕
消長夏清逸援琴靜洗心塵遠頓令忘世

慮小牕無暑坐來深

秋五

小隱園亭草樹稠方塘環碧水雲浮長松
密蔭苔堦碧叢菊香芬花徑幽丘壑放情
閒歲月漁樵混迹自春秋乾坤俯仰渾無
慮長日惟看麋鹿遊

秋六

九秋爽氣滌煩襟綠野逍遙塵外心山月

溪風饒逸興疎桐靈籟發清音松篁地僻
軒楹靜闌檻秋高風露深盧橘繞亭垂萬
顆芙蓉映水照疎林

池亭東畔新植芙蓉盛開故云

秋七

亭開綠野繞湘筠樹色山光翠接隣百歲
行藏孤鶴伴曲闌花木四時春回琴點瑟
宣靈籟魚躍鳶飛見道真心境悠然超物
外漫招風月續秋吟

秋八

野煙浮翠繞芳亭小隱幽通物外情三徑
菊松存晚計四時風月自閒評魚依淺碧
堪垂釣水湛方塘可濯纓喜脫塵樊舒倦
翼滄江久擬結鷗盟

秋九

閒心却笑野雲忙物外光陰隱興長溪友
山翁共來徃樵雲釣月自行藏霜前塞鴈

賓南國雨後寒花耐晚香
風月招呼恣觴咏不妨
名教任踈狂

秋十

小小園林三徑開
數竿脩竹間松栽
竹挫環珮吟風葉
松奏笙簧隔水隈
掃榻常無俗客至
携琴時有故人來
地偏小築真堪隱
吟對青山漫舉杯

秋十一

宦海浮沉三十春
歸休今喜樂天真
由來富貴浮雲物
久負滄江把釣綸
野性擬尋麋鹿伴
隱情偏向菊松親
葺茅綠野煙霞地
別是乾坤歲月深

秋十二

七月望前二日夜坐

千家砧杵動秋聲
病骨驚秋覺漸輕
萬里乾坤金氣肅
九天風露絳河清
賓南塞鴈迷雲夢
直北關山拒虜城
身世幸逢全盛日
海濱歸老頌昇平

感秋

四序平分秋氣清
亂山高下白雲橫
三江澄碧明秋色
萬戶迎寒搗練聲
木落洞庭天地闊
鴈來澤國暑寒更
細看景物驚搖落
短髮蕭蕭白漸增

燕敘亭閒坐有作

五峯峭拔自天成
翠擁方亭列畫屏
白石蒼苔塵自遠
琪花瑤草澗邊生
煙蒸谿壑嵐光碧
雨滌巖巒巒巒泉溜清
別是乾坤奇絕處
人間亦自有蓬瀛

秋日燕坐小亭

休官林下閒風月燕敘亭中漫咏觴何處
寒砧敲永夜誰家長笛發清商空江木落
千山靜塞鴈天高萬里翔景物蕭森金氣
肅蒼山碧水湛秋光

卜居平野蒼煙地翠繞苔堦隔世塵曲澗
水流花徑淨小山雲暖草亭春涉園採擷
酬芳興習隱清修見性真靜裏乾坤遂疎

懶祗應高臥碧山雲

春日湖上

無端柳絮舞晴空亂撲芳村逐曉風海燕
爭飛高上下林鶯求友自西東柳塘接葉
陰千里花塢連枝影萬重啼鳥不禁聽落
日野晴芳思着衣濃

四月五日舟泊鴛湖

鴛湖風景亞西湖山水微茫入畫圖水接

洞庭通四澤山環秦駐帶三吳浴鳧飛鷺
羣欺燕岸芷汀蘭雜間蒲盆浦漁舟停返
照數聲欸乃起滄波

喜得第二孫次溪南韻

小隱堂依水竹居海山佳氣接吾廬地偏
敢謂種靈異世積寧論慶有餘春滿芝蘭
重見發舊存典籍賴無虛掀髯嘯咏林臯
下長伴煙霞百歲軀

閒居卽事

長夏陰濃草樹齊海天霽雨熟梅時奇峰
切漢雲流翠炎帝司衡斗轉離地僻萊蕪
禾遍野梔鳴溪澗水平畦村村耕稼愁懸
磬民牧應思一賑饑

雪舟聯韻

此詩作於正德戊寅近
於故戚家詢得之續附

鎮日雪花飛不斷壑移舟費力坐遲回何
人懷舊去復返爾玉有客局門臥未開茆屋

萬家皆玉屑淵江山千里絕塵埃誰知談
笑扁舟外時雍多少呻吟在草萊璩

和

雪壓凍雲山郭暗寒汀波落海潮回江村
牖近梅爭放茆屋寒深戶不開崖谷得春
皆潤澤乾坤無處著塵埃先秋最喜徵三
白應有謳歌遍草萊

一夜西風震地狂曉來密雪恣飛揚寒深
窮屋呼隣火凍合長淮亂野航舟至移風
萬壑盡平封玉屑千林獨秀有梅香隴頭
擬寄春消息江北江南道路長

片雪紛紛壓凍雲千家山郭混朝昏何人
夜半還移棹有客寒深獨閉門江縣放梅
驚晚歲淮濱共雪對吟尊天涯後會知何
地憂樂同心重細論

雪壓梅花春意饒梅傳春信到江臯雲連

絕海天垂幕冰瀉長淮玉作濤一色乾坤
還太古千山鳥雀自深逃扁舟遙繫寒城
外滿眼流亡首重搔

寶應湖晚行

湖上風光入畫圖渚清沙白鳥相呼水雲
浩蕩連南北煙樹溟濛半有無霞映海山
浮紫翠潮迴江浦亂鷗鳧清時誰擊中流
楫望

闕心懸夜月孤

秋日登樓

西風天畔獨登樓萬里乾坤入遠眸海際
華夷山亘脉江分吳蜀水通流雲歸遠岫
千峰暮葉下高梧萬樹秋落日層城思無
限長吟不盡古今愁

感時

蕭森秋氣入林稍回首漫山落葉交鸛鶴

追飛雲外路鷓鴣巧結日邊巢兼天波浪
搖江郭接地風雲蔽野郊時事關心悲滯
客擬從羲易驗著爻

次顧大尹秋日感懷

帝城面面控關山金水通靈百折灣雙闕
瑞雲浮御氣九門寒漏待仙班戈旄夾陛
陳天仗臺省封章動帝顏薄劣一官叨簿
領鳴珂何日廟廊還

長至舟次清源飲盛憲副德新

一陽初動管飛灰生意潛從土脈回漏泄
春光官道柳侵凌雪色古牆梅南舟此日
津亭集東臬行臺尊俎開笑接霜威驚令
節不妨深酌盡餘杯

南旺道中風雪感懷

廣野驚沙起朔風亂雲急雪蔽寒空旋看
窮巷虛人迹謾喜春田報歲豐古木深枝

藏凍鵲澄湖遠渚集飛鴻此行不識山陰
道欲訪淮南郢屋窮

晚過安莊衛次院壁韻

雉堞參差郭外城落霞飛處暮雲橫嵐浮
紫翠千峯霽地迴風塵萬里程氣肅清霜
山郭靜聲懸孤角戍樓鳴幾迴夜半聞鷄
起鄉夢驚殘旅宦情

次黃學憲郊西漫興

亂石流泉通小徑青山白舫照平湖虛亭
地迴臨冠蓋疊嶂雲閑列畫圖幽興何年
歸栗里高秋此日憶松鱸深漸浪迹今蓬
鬢却笑浮名猶故吾

安寧道中雨晴晚行

海天虹斷落霞飛殘日蒼茫翠巘西絕澗
流泉吐寒碧亂山霽色照晴溪沙邨隱見
雲歸樹石磴參差水滿堤况是野行傍昏

黑可堪峻嶺費攀躋

過安南坡

日射層坡五色浮，泉通洱水迥西流。
翠微雲斷千峯霽，碧樹風高萬葉秋。
野遍黍禾懸國稅，山連城郭限邊州。
乾坤萬里雙蓬鬢，擬向滄江理釣舟。

姚安道中

野煙浮翠接平岡，一派涼聲萬木蒼。
雲物蕭森山變態，澗流澄碧水涵光。
高天日落孤猿嘯，遠道秋驚兩鬢霜。
擬泛蓬瀛脫塵跡，浮沉陸海恨無梁。

次初憲副內濱遊太華寺

翠微深處松藏寺，雲外山僧掃落花。
丹牖空明開日月，石堂虛碧闕煙霞。
諸天法界輝金碧，萬里南荒屬帝家。
塵思獨慚追雅詠，萍踪漫擬泛仙槎。

同錢公良年兄登第一山躋攀竟日
追感夙契因次其韻

秀拔東南第一山諸峰羅立互廻環靈鍾
淮楚龍興地勢壓乾坤虎踞關今古華
夷崇勝槩雲霞臺殿列仙寰躋攀竟日空
塵眼共倚東風一解顏

再疊前韻

聯鐙同登第一山長淮千里帶如環畿封
此冠都梁景宋室曾當胡虜關
陵寢萬年鍾瑞氣煙霞千里渺塵寰廻瞻
絕壑多佳勝掬得清泉洗俗顏

題竇秋山卷

隱居高士秋山裏日日開堂接翠微畫裏
白雲天欲遠眼中青嶂鴈來稀芙蓉秀插
三千尺欄楯低遮十二圍我欲凭凌向高
處數峯寒碧照人衣

峰溪集卷之四

峰溪十二景次韻

霽雨宿嵐收
晴空紫氣浮
曉看峯頂上
時見彩雲流

右晴峯

輕雲長閣雨
峯頂半晴陰
舒卷渾無定
相看似有心

右雲峯

峻出羣峯上侵雲勢接天秋空多爽氣偏
浥露華鮮

右高峯

四野浮煙靜峯巒隱約間望深滄海畔逸
興擬躋攀

右遠峯

獨立無山阜孤高孰與同秋聲振林木虛
壑自吟風

右孤峯

青山一夜老浮白射虛簷玉柱搖銀海冰
花似綴鹽

右雪峯

雨霽淨如練光搖杜若洲粼粼浮淺碧天
上坐春舟

右晴溪

溪鳴懸驟雨岸柳野煙昏盡道風光儉孤

舟自到門

右雨溪

水天同一色波淨不驚風
閑詠滄浪曲人疑在貝宮

右澄溪

瑞彩懸空碧浮浮五色華光分天外
棹綺散渚邊鴉

右霞溪

水竹映朝曦流光蕩碧漪
輕霏猶未散鷗外胷遊絲

右曉溪

渺渺葭蕪外溪涵萬頃秋
波光天接碧落日暝煙浮

右晚溪

清明過崇德見桑麻蔽野

兩岸桑麻地千村桃李花
清明今日是插

柳記年華

夜坐小飲口占

細酌三杯酒長吟五字詩朱門多肉食清
味少人知

辛巳歲余以入 賀北上舟過界首

舊友薛東橋持觴飲餞于湖津迤
邐越數里情猶繾綣及暮言別臨

風口占

話別津亭酒幾巡東風回首欲沾巾乾坤
落落誰知己南望停雲憶故人

平原道中

路入平原如砥平霜風一道驛塵清巡行
郡邑非無事要識民風土俗情

覽鏡口占

年來白髮漸蒙頭笑我行藏不自由何日
盛溪溪水曲盡船簫鼓共追遊

見邊牆

邊牆萬里古長城雉堞連雲護

帝京

聖世河山無內外華夷一統自清平

山行折梅

路入湘山見野梅幽香細細逐風來一枝
試折清塵眼遙憶西湖萬樹開

七月一日示植兒

頭角憐渠異下愚好將經訓作菑畚秋牕
入夜多涼冷燈火青編定卷舒

感寓

荻蘆風起午潮生漕艘帆檣沙際橫短棹
水雲深處泊出江遙望浪花平

過徐見民被水依山有感

災民遙倚碧山岑廬舍茫茫何處尋衰草
寒雲煙火靜秋風萬壑亂蟬吟

盤陀山曉行

野寺鳴鐘徹曉關
肩輿挫曳翠微間
崇岡千仞盤空上
漫逐浮雲度碧山

觀王官谷休休亭詩有作

休休亭畔隔塵寰
亭倚煙霞草樹間
到此灑然超物外
令人心共白雲閒

山行見泉

石竇噴泉絲萬縷
洞門遙映水晶簾
穿雲

絡石歸深澗
澄碧乾坤一幅縑

平望舟行

白蘋紅蓼滿汀洲
碧樹蒼山萬里秋
風景清奇圖畫裏
水天一色泛孤

咏梅

老梅移向小園栽
疎影橫斜傍水隈
自是孤根回煖律
先春偏占百花開

新正試筆

占年應是太平時
風暖雲和景色熙
籬落萬家雞犬靜
夕陽村巷醉人歸

臨池閒坐

水邊林下足徜徉
幾度臨流自舉觴
心遠地偏無箇事
靜看魚鳥兩相忘

東溪卽景

紅蓼青蘋映渚沙
溪流曲曲野人家
白雲黃葉沙村晚
孤鷺斜飛伴落霞

觀物口占

桃李東風三月天
晴光艷冶景無邊
烏啼芳樹花飛急
綠颺沙村萬柳煙

三月初九夜微風
皎月花陰月影幽
徑嘉勝呼酒賞酬良
宵曲闌東桃花競開
持杯倚看良久花飛
入杯似解人意迎風
口占

桃花飛入酒杯中
花泛流霞酒泛紅
月下

放歌偏縱飲曲闌倚遍醉東風

池亭夜坐七月十三日

方塘水月色相鮮清氣侵人骨欲仙坐久
真疑塵世隔乘槎擬泛斗牛邊

積月不到會心齋塵埃壅塞七月十

九呼童掃除口占

掃盡塵埃心似水滿堦黃葉動秋聲臨風
撫景發天趣靜裏乾坤萬古情

涉園有感

小園水竹穿沙曲地僻通幽繞徑花獨步
悠然自成趣四時風月屬詩家

病起觀梅

喜除藥餌慶芳年綠遍沙村萬柳煙繁李
夭桃競春色風光漫野付詩篇

夢遊山

路入崇山草樹深幽林曲澗石苔侵翠微

臺殿雲霞曉時聽松風度梵音

春暮小園桃李花落殆盡偶見一花

因而口占

忽報春歸何處尋東風滿院落花深小桃
一樹留春意猶有紅英戀翠林

小隱亭池蓮萼二枝東西懸對踰尺
五且榦無高下七月八日齊開無
先後遠觀可愛因而賦之

方塘半畝湛秋空蓮萼秋分照水紅雅艷
亭亭風格異不隨桃李媚春風

夜坐看月

碧天如水夜沉沉庭院深深月色侵幾度
倚闌耿無寐塵心洗盡見天心

九日菊未花

無花無酒更無詩空負登高九日期擬向
東籬拈菊蕊呼童携酒泛金卮

九日齊山興未賒翠微何處擬登臺山童
爲報東籬菊昨夜枝頭蕊半開

三月廿二日過西園小飲

西園猶得見殘春載酒看花發興新却笑
多情牆外蝶隨風來往逐遊人

舟次南湖望見真如寺塔有作

偶携煙艇傍湖灣望入叢林欲叩關木落
蕭蕭山色淨白雲深處一僧還

小隱亭偶成

小隱亭中小隱仙山中甲子不知年碧桃
靈草春常在地隔紅塵白晝閒

晚步

野亭東畔小池西芳翠林深翳晚暉拂石
坐看山月上山童夜報鶴初歸

閒居述懷

僻居久與世情疎野興偏宜水竹居秋月

春風自閑適日長無事帶經鋤
林下常居酒一壺閒邊風月任招呼冠簪
久已辭明世更擬扁舟泛五湖

庚子四月十二偶成

青山綠樹真成畫明月清風不用錢景物
會心發天趣浩歌俯仰出塵緣

三五七言卽景

移桂棹泊江津明月如有待清風來故人

白雲紅樹吟邊景碧水蒼山塵外身
蓼花繁楓葉丹野鷺依蘋渚漁舟傍柳灣
塞鴈聚沙驚復散白雲出岫去仍還

峰溪集卷之五
廷試策

臣孫璽

臣對臣聞帝王之御天下固貴乎盡
爲治之大端尤貴乎立爲治之大本
大端者何法天法祖宗是已大本者
何在正其心是已蓋爲治而不法天
法祖宗則用智任情幾何而不違天



下之公理戾前人之成憲耶欲法天
法祖宗而不先正其心則本墮體虧
將見推之而有不准動之而有不化
者矣其何以成天下之治哉此唐虞
三代之君率由是道所以際雍熙泰
和之盛漢唐宋之君罔克斯道所以
僅成小康之治而已也仰惟

皇上聖由天縱德體乾剛值鼎盛之年撫
盈成之運夙夜勵精圖惟治理廼於
萬機之暇特進臣等於
廷不遑他務而首以

法天

法祖宗之道

降綸音而問焉是卽仁人孝子事天事
親之心也臣雖庸劣膚淺敢不披瀝
愚衷以對揚

明命之萬一乎臣竊惟人君一身上焉而
有天命之倚賴下焉而承祖宗之付
托不法天以出治則好惡任情刑賞
無法鮮有不違天之理拂天之意者
而不可謂享帝之宗子矣是天道不
可以不法也不法祖以爲治則張弛
失宜政治無緒鮮有能善述其事善
繼其志者而不可謂享親之孝子矣
是祖宗不可以不法也蓋嘗觀諸唐
虞三代矣堯舜之欽若代天成湯之
功格皇天高宗之憲天聰明是曰代
曰格曰憲言雖有異而其爲法天則
一也太甲之率祖攸行視乃烈祖成
王之無念爾祖是曰率曰視曰念言
雖不類而其爲法祖則同也自是而
降若漢唐宋之君或責躬以水旱或

從事于封禪或信奉乎天書若可以
爲法天矣其與虞夏代天憲天之道
何如也世之不能大治者得非法天
之道有未盡與或謂其自有制度或
欲效貞觀之治或屢行紹述之政宜
自以爲法祖矣其與商周率祖念祖
之道何如也治之終不古若者得非
垂統之道有未善與此漢唐宋所以
止于漢唐宋而不能唐虞二代也有
由然矣欽惟

皇帝陛下踐祚以來于茲三載仰體天心
無一事而敢違乎

天動遵成憲無一政而或戾乎

祖宜無待于

法天

法祖矣而猶拳拳以有不易盡爲慮是誠

夏禹不自滿假之心周文望道未見
之念也臣伏讀

聖制有曰天之道廣矣大矣不知今日所
當法何者爲切臣愚以爲天之道至
廣而無所不體至大而無所不包蓋
無一事而非所當法而其所最切者
則在于慎刑布德而已臣願

陛下施刑罰也必如周惇頤所謂天以春
生萬物止之以秋而不過

法天之秋肅而不私則君之刑罰一天之
雷霆也布德惠也必如董仲舒所謂
王者宜求端于天任德而不任刑

法天之春生而不慘則君之德惠一天之
雨露也夫如是則天道信無有不法
而子太叔所謂刑罰以類天震曜慈
惠以效天生育者在是矣其視成湯

之格天高宗之憲天蓋異世而同符也夫法天而能如有商賢聖之君則道已至矣庸何法天有不易盡耶

聖制又曰

太祖高皇帝之創業

太宗文皇帝之垂統

列聖之所法以爲治者布在典冊播之天下不可悉舉不知今日所當法何者

爲先且急愚以爲

祖宗之訓語大而大盡善語小而小盡美固無一事而非所當法而其所先且急者則在于修己用人而已臣願

陛下修厥身也必如洪範書于殿廡精誠講于經筵宮中披閱旦夕不倦騶虞封禪却而不納以

祖宗之所以修己者而修己焉用厥人也

必如恩禮篤於湯和論相審於劉基
蹇夏之委任不疑胡楊之顧問有托
以

祖宗之所以用人者而用人焉夫如是則
祖訓信無有不法而李絳所謂正身勵已
遵道德進忠直以與祖宗合德者在
是矣其視太甲之率祖成王之念祖
蓋異人而同道也夫法祖而能如商
周繼體之君則道已盡矣庸何法祖
有不易盡耶是則

天命之度切于慎刑布德而

祖訓之式先于修已用人如此若循其本
而論之又在于謹其心術之微而已蓋
人君一心攻之者衆苟不先正其心
則喜怒易以搖而賞罰或致于失當
雖欲

法天道之公其可得乎儉邪得以間而政
事必致于紛更雖欲

法祖宗之治又可得乎是必靜焉敬以涵
養此心之體動焉敬以省察此心之
用親賢講學虛己澄源

深宮如是

大廷如是微言如是大政如是而凡聲
色貨利土木之類舉不得以搖蕩之

則此心清明義理昭著欲弘道而道
無不弘欲行政而政無不善可以仰
承

皇天眷佑之心可以延綿億萬載靈長之
祚可以匹休唐虞三代之隆而陋漢
唐宋于下風矣所謂

法天法祖宗之道又寧有出于此心之外
者哉顧臣言雖淺陋無非拳拳憂君

愛國之念所發也

陛下能留神採而行之則天下幸甚萬世

幸甚臣干冒

天威無任戰慄之至臣謹對

送祝琴士歸江右序

琴未易學也亦未易以精也夫學焉而得其精者固難有樂之德以將其聲者爲尤難遡觀先生之爲琴也宣天地之和通神明之德用是以變易四時安治家國禁止吾人之邪心以陶養夫性情殆非其取美音聲以爲娛樂之具故夫業是琴者庸非心其聲以得其實不可也余嘗稽諸古之

以琴名者無慮數家若伯牙鼓之而六馬
仰秣師曠鼓之而鳴鶴起舞以至王敬伯
之致神女現賀韜之致鬼舞師文之變易
寒暑孫登之感動風雷要皆由其養夫優
柔平中之德而發爲清遠曠達之音用能
動天地格鬼神馴鳥獸如此也後世率不
知正其本徒區區工于音聲之末雖足以
取悅俚耳而漫無裨益人心況望其格神

感物之云耶南豐祝尚宜以琴鳴于江湖
久矣厭新聲之奇變而獨究意于古調之
希微且讀書好禮讓是匪徒音律之精而
又有樂德焉觀其操絃而作也聲含太古
格調清絕始之以文王之思舜賡之以宣
父之猗蘭優游揄揚其急也鏗然以疾如
冰瀉玉壺飄風驟雨之夜至也其緩也紆
然以徐如鳥韻春和浮雲柳絮之飛揚也

其傷感悲憤也則淒淒切切如愁猿之嘯
月孤鶴之淚空也體勢橫出而莫測其妙
是其人雖今而音則古今聽之者忘倦誠
足以發洩其幽思動盪其心志蓋深有得
乎風雅之遺響者信其爲江湖中第一手
也使祝君能不自滿焉克而躋于伯牙之
列他日鬼神之格鳥獸之馴尚未可知也
予素有志于琴甚愛之重之嘉其德賞其

音進祝君而傳以關雎之調於其行也偕
諸公之餞爰序其實歌以歸之歌曰

眼前琴士蠶如密有如祝君寡儔匹爨桐
移自西江來器宇軒軒妙音律一日過我
開錦囊鳴玉戛金聲鏗鏘雲寒絕壑潛蛟
舞月冷丹山彩鳳翔我我高山復流水心
游太古羲皇裏陽春白雪有遺音一洗人
間箏篴耳賞君擬賦瓊瑤篇愧我才疎徒

拳拳曲終賡奏雙清調風滿林梢月滿天

遊雅山記

吾郡號稱澤國泖湖溪澗聯絡縈帶水居多而山阜間見維邑東南九山瀕海西偏則雅山也夫自開闢以來有此天地卽有此山川泰華嵩衡表鎮方岳巍然名高萬古其間錯布峙列宇內者凡山不足言已均之形勝秀拔盖有名顯百世之上而或

潛伏無聞者其亦氣數然耶抑地得人與否焉耳粵稽輿圖天下名山武夷以朱子顯瑯琊以歐陽勝而壺關天台則以九老劉阮名匪得人焉以王之亦終蔽而已矣於戲事之幸不幸者時也其遇不遇者天也山之或顯而晦者數而人也且雅山載諸郡志余嘗閱志而知其名矣少自家食時業在經史足不履嘉山水及通籍宦遊

郡臬役淮揚道齊魯歷燕薊陸沈簿領無
虛歲顧奚暇於覽勝玩物耶嘉靖庚寅春
予適家居潘子溪南每見亟稱茲山之勝
甲於東南寤寐登覽浹旬朱子東谷至興
復不淺遂命舟偕往距山二里許河隘舟
不能前維時和煦景物明熙迺各服宜春
服舍舟登陸徜徉大道迤南居人四五家
皆棘樊荆扉前帶淺流平浮一小橋踰橋

百武至山麓循麓歷坡而上石蹬巉絕躋
扳却步爰折而西盤旋躡蹬東上東谷足
力弱不能從跌坐盤石予與溪南亦小憇
石上天風瑟瑟涼爽襲人少焉復折而南
維石齒齒縱橫變態有壁立類人者有盤
互類木走長根者突怒土中類迸笋者類
獅象蹲者類虎豹踞者類波濤湧者他莫
名狀沿山椒陟峻嶺群峯敵面秀拔森羅

真若游龍戢鱗翔鸞振翮龍從翠鬱縹緲
天際盡東南之勝者茲山也予遊興益濃
東谷倦且止復偕溪南攝衣絕頂遠觀近
眺景物環會東引陳山之雲北攬吳淞之
秀南眺滄海萬象浮載波濤吐吞朝曦夕
照映彩流光憑高而遊望者飄飄然瀟灑
出塵殆有浮槎犯斗之興勝莫能窮日暮
循山而下山東北地漸夷曠有住僧闢地

創小禪室出迓執禮甚恭延坐具茗飲飲
訖各賦七言律授諸僧以識歲月愧予無
能爲茲山王繼自今有高人卜築以養真
碩儒靜修以弘道達士登遊以遺跡人傑
地靈茲山殆將與瑯琊諸山競勝於中原
矣寧復自昔晦冥於海濱耶故曰地得人
而勝山不得人烏乎顯姑記以俟後遊者

丘時鳴字說

余自正德丙寅復遊南雍慨舊學之廢而
麗澤是圖居無何獲識應魁李先生蓋江
右豪雋也業精麟經而聲蜚六館且其中
坦夷無陵谷余竊以得友自慶未幾又識
其徒丘時鳴時鳴娟好靜秀其言侃然其
行渠然其用心綿綿然出經入史手不停
披而日記千言亦今之所謂好學士也予
嘉其志遂移筆硯作斯文會社世慮忘形

迹相與臥起者匝一載既而予將東歸時
鳴持觴餞送乃進予而言曰吾之生受于
父而得鑿之名洎冠受于師而得時鳴之
字未聞其義幸予子相好願乞一言以教
我也予避席再辭弗獲乃爲之說曰鑿之
爲言鸞也以金飾體而用之車者也升車
則馬動馬動則鑿鳴使車行而徐也則鳴
與和應而其聲鎗然以齊車行而疾也則

鳴與和乖而其聲促然以急是鑿者實爲節車之音而鳴之欲適其時者也故子之父以鑿名子欲其知器之貴于有用而師以時鳴字徒欲其知行之貴于有節耳子其顧名思義循循駸駸修吾德檢吾身以勉進于是於焉由一車之器以求至于君子之不器乘可鳴之時而求至於行道以濟時大以鳴天下次以鳴一國或以勲業鳴如伊傅之于商可也或以文章鳴如韓柳之于唐可也或以道德鳴如周張之于宋可也達權通變夷險顯晦隨處隨宜而無不可行之地斯則善鳴于時而不負子之父師命名命字之意也余不佞姑述以爲說吾子其尚圖之

書類選杜詩趙註後

杜詩序之詳且衆矣有謂表裏風雅憲章

漢魏者有謂凌轢沈宋並驅李白而詩集大成者又有謂杜詩史也李可選而杜不可選余何敢喙竊謂詩書孔子亦刪之殆亦無嫌於選也矧杜詩篇章浩繁縱橫闢闢變化無窮未易曉解非學士大夫具正法眼藏者莫能博其旨趣蓋得其門者或寡矣唯虞文靖張伯成嘗註釋七言律子常復選註五言庸啓後學故凡欲學七言律者得以尋繹文靖伯成註釋而學五言者率體驗夫趙註庶幾知所適從誠學詩律者之指南是故無嫌於選也舊編刻自廣平壬辰余濫僉滇臬滇僻遠西南隅得之鮮且難爰命工翻刻用廣其傳於邊徼蓋不獨於中州流布也

書雪舟聯韻後

雪舟聯韻倡自薛漳涯而南溪代涯醒

軒諸公更互唱酬而璽亦竊預焉因得
五七言詩各若干首詩蓋不獨諧協聲
律以詞章相勝而已諸公居江湖而切
愛

君憂國之意燁然溢于唱和間殆深有裨
于政治也漳涯用是刻於淮以識不忘
但詩各系以別號傳播恐弗喻于人人
矧于古體蓋有戾爰僭釐正而易以名

并附續諸大家者爲一卷重命工鋟梓
以俟達觀者采擇焉

正德庚辰秋八月望日書于維揚貳守
官舍中

奉侍御張起溟先生書

嘗謂興天下之利者易除天下之害者

難興一方之利者易除一方之害者難
蓋除害所以興利也今天下之利害大
要在監司何者監司近君之職所以寄
朝廷之耳目者監司得其職持明秉公詢
察郡縣之得失濁者激清者揚天下之
郡縣得人則天下之害除利興而
朝廷之耳目廣矣一方之利害其要在守
令何者守令親民之職所以固

朝廷之邦本者守令得其職循名責實體
悉民間之休戚強者鋤弱者扶一方之
民庶得其所一方之害除利興而
朝廷之邦本固矣今足下

朝廷之監司也猥職

朝廷之守令也足下之按維揚於鹽課則
尸位而不理爲豪民反曲法以求生竊
謂絕天下之利而養天下之惡者況望

興與除乎求欲廣

朝廷之耳目不可得也猥職之令興化於
災民撫救三年之餘遇豪惡除雪百姓
之恥竊思興一方之利而除一方之害
者況敢絕與養乎求欲固

朝廷之邦本不敢後也試以一方之害言
之維揚民頑莫過於興化興化民豪無
甚於惡人觀其於古鄆之楊縣丞挾制

罄擄其囊而楊卒忿疾以死平陰之程
王簿設穿指銀伍百而程卒罷去其官
一時在任者畏豪如虎事無大小囑之
翕從而莫敢與抗其把持官府也如此
他如高閣學之子員外郎捏詞誣害挫
辱屈膝而後免鄉之經歷曰魏儲罵逼
利債百計窘辱而縊死庠之廩生曰宗
珮無端尋釁嚴辭叱跪於通衢其陵虐

士夫也如此又如侵奪官民田塲數千畝吞併民人產業若干家徵錢債屢威逼人命盜庫銀反打死平人強奸人之妻者四奸占人之女者二因奸而毒害威逼燒死人之妻者三其虐害鄉民也如此至于駕樓船以列軍器坐官馬以辟行人錦衣華屋之僭用京軍塲竈之占役此皆疇昔豪橫之大略而一切不

應細過盖不可以縷數故闔郡人士皆號稱惡人殺者也自猥臈下車以來稔聞其爲淮南之首惡江北之巨魁絕私謁以防其浸潤之微嚴門禁以杜其把持之漸不五月而民訟其違禁取利越明年而民又訟其奸占其妻於時欲圖剪除以安百姓也竊謂負嵎之虎勢不可輕搏者姑寬法縱罪而撻以警之又

明年而謀財毒藥道姑乃地方具呈於縣始拘姑之徒及隣佑以試審其虛實彼豪之家人父子兄弟蓋無一有及之者而豪弟徐某敢于率衆數十餘人擒差人而輒擅鎖打奪取道徒并其囊橐而盡攜歸其家既而軍人畢綬有圖財謀故之狀地方隸兵有拒毆攝人之呈方始遣牌拘擒豪益放縱聚人如蟻而勢莫與敵乃移文諸凡

上司率下令緝捕治罪豪始就擒獲由是累歲被害之邑民赴愬吞謀其產業侵奪其田場奸占其子女及窩藏軍竈違式服舍事情於縣者五十餘家訊鞠匝月而成獄始條列其罪狀而呈詳於撫按撫按初若疑其過甚而卒訪得其實情咸是猥職之果於除害而

詳允之故邑民始而豪未除也而有惡人殺之號終而豪既除也而有殺惡人之謠商賈擊節慶于市老穉鼓腹慶于鄉是歲湖蓮呈並蒂之瑞隴麥秀雙穗之奇通邑人士駭異之僉謂巨惡甫除禎祥荐至天人之理不爽如此歲壬申猥職三年滿考率多有冊有卷以紀其實而楊秋官實夫遠自留都侈文以敘

其槩

揚諱果後自文選正郎歷官亞卿

彼鄰封大夫士

亦彙次詩文若干首以表異之會癸酉春銓部簡別天下良有司而猥職誤蒙撫按旌異者三保舉者一而獎勵者五於時例取作邑四十人而猥職濫名於其二先是猥職不阿侍御君某之囑假以酷暴進讒

都院而斤落猥職猶賴公議沸騰尋復

蒙

恩仍外補詎意妄罹匪人黨豪樹謀駕一

偏之浮詞動

九重之命令轉行足下足下乃不甚傾信

輿情而反有偏徇之聽兼之衆難填胃

羣疑塞腹惴惴懼勢畏豪以保祿位時

奄張銳掌東廠受豪數千金令其具狀

武廟旨着彼處巡按御史公自打着問不

諒猥職除害以安民顧乃窘之以刑辱

久之以禁錮情無假借於吾人法欲推

移於豪橫嗚呼斥松於櫟貶若過矣而

於松也無所損崇猶於蘭褒若似矣而

於猶也無所益今足下乃賤其所可貴

而反貴其所可賤者庸非善善惡惡不

公如此耶且善誠可旌也雖平生之讐

怨法不容以私掩惡誠可誅也雖親昵

之近戚法不容以私宥蓋法者傳之於先王受之於天子而與天下共之者固非猥職可得而妄加亦非足下可得而專制也試嘗求昔之按巡諸公矣如劉如趙如江後先執法同予心以除豪者也足下畏忌猜嫌異予心以助豪者也假令此豪之除不厭人心而違天理昧公法乃故爲借言飾已而妄議尤人此則名教中所不容也今觀猥職自松來揚五閱月矣興邑民人大夫士凡不畏豪而遠來問勞者已不下百餘人顧欲來而畏豪中止者蓋又不知其幾也其他人士有自海陵而來者有自真州而至者蓋有自秦郵界首而遠顧者率惟爲公道也夫公道不但槩在維揚州邑士人口也雖荆襄山陝商人聞知見知

者無慮百餘家猶爾抱屈稱不平者若
一口嗚呼士君子於天下事惟求其是
而已今觀諸遠近人士若此則猥職除
惡之得其是明矣借使有非予而是豪
者必豪之私黨也敢爲欺天罔人浪鼓
雌黃之口以搖撼人心之公道耳舍若
輩而號於興民曰予貪予酷而豪不暴
不橫雖窮民乞人嬰兒不信也嗚呼是

何公道稔明於維揚士民而獨暗昧於
足下明察耶故人言有謂足下以私者
也私固吾不得而知也有謂足下以公
者也公亦吾不得而知也借使吾而果
貪耶果酷耶曰貪曰酷皆足以失職則
猥職曰罪人也豪民曰罪人也是宜其
禁同其法同其挫辱同也今贓賄不關
於毫末而豪民罪宜服上刑殆非貪非

酷者矣非貪非酷竟足以得職則猥職
蓋今之興化舊官名猶民之父母也豪
民乃昔之興化要囚實則民之賊子也
夫曰官曰囚大不侔則其禁其辱宜差
異而足下乃懵然比而同之是何異夷
王于石混白于皂寧不拂天下之公道
阻正人之直氣而乖違士夫之清議也
哉或者乃曰足下執有

欽依公自問理之權論法當如是而予獨
以爲不然足下

朝廷法官也守法當自己始今足下於
敕命束之高閣鹽阻五月之餘船塞百里
之遠其抗

君也如此遇

恩詔稱疾不迎何先期而理訟輒後期而
宴飲其欺

此法身卷五
君也如此體貌肥白如瓠緣畏難而避事
遂疏疾而欲歸其誑

君也如此夫曰抗曰欺曰誑臣子有一於
身凜乎法不容宥今足下萃是三者而
若罔知畏固乃拘拘以禁人爲奉法則
是爲人畏法而不爲已畏法也嘗聞昔
人謂明主不蓄無用之臣慈父不愛無
益之子克足下之心而論之殆有無君
之心豈直曰無用之臣在明主不蓄而
已耶雖縉紳亦必麾斥也極豪民之罪
而論之盖有滔天之罪豈直爲無益之
子雖慈父不愛而已耶在王法所必誅
戮也合而觀之是足下處大不法之地
而豪民乃大不道之民以自處大不法
之地而欲屈法宥彼大不道之民盖憂
憂乎其難也且如詐欺取財猶計贓准

盜況徐某陰謀奸婦李善清毒藥殺取
道姑財物乎罪犯十惡焉得偷生畧賣
良人猶決杖坐流况徐某奸占活人二
妻女因奸威逼王氏致死乎罪兼絞斬
寧容脫死拒毆攝人律且杖刑今徐某
既奉官司拘人合令赴官面證聚衆打
奪毆傷公差寧容不坐罪乎開榔見屍
律猶處絞今徐某既打傷道人致死復

黑夜燒屍棄河死者無辜寃積地下寧
容不抵命乎借若此豪有平昔欺天害
民之豪橫而無今日奸盜毒人之慘惡
其法或可推移也有今日奸盜毒人之
慘惡而無平昔欺天害民之豪橫其情
或可借疑也今豪橫若此其甚罪惡若
此其深據法蓋無可宥之條原情殆無
可疑之理却廼掩飾實罪以欺

上駕捏浮詞以陷官萬一漏網偷生展轉
妄攀原問竊恐天下爲守令者聞之必
畏縮退避皆將曰某官除害而被害我
何苦而好爲是除害也天下爲豪民者
聞之必做倣成風皆將曰某豪旣擒而
復縱我何爲而故爲是斂迹也是使天
下守令由此或不敢以剪除豪民天下
豪民自此或皆得以誣陷守令顧官欲

效循良者恐日少彼民欲肆暴橫者恐
日多大而流賊之擾攘未必不卽此豪
民而釀成小而地方之竊發未必不自
此豪民而啓召是縱之不過復害一邑
之良民克之其實流害天下之百姓矣
興言及此誠賈生所謂可爲長大息者
不容不試仰首一鳴號也足下少賜觀
覽亦足以知其志之所存伏惟深察之

無忽

重建竇氏墓碑記

秋山竇君宋臣璞之裔也予於史亦知璞之名而未得其詳有慎菴王君與予交爲莫逆一日來謂予曰竇秋山爲兒女至親將復樹墓碑非格言不足以喻後敢請乃知璞至秋山越數百年時移世變而僅存其墓且得璞之故敕告身而真跡炳然傳

守如昨爲家之文獻因持雙湖戴君先所撰墓碑示予予謂雙湖爲世之名豪端介不妄言而無諛觀其記之顛末則璞之宦遊履歷之高亦一代人物然而千古斯文氣脉相孚不能不爲之歡仰竇氏古墓巋然與靈丘奇塚爭雄秋山其賢子孫矣志存起廢開拓舊業必以祖宗墳墓爲先汲汲皇皇不遺夙夜葺而守之勞心力經歲

月封焉樹焉亭臺隧道規制井然作永觀
立經久之計孝思之篤至矣盡矣夫君子
之垂統緒欲令繼續而行其如守成之難
何世之人知其爲難者多而能保其所難
者少欲以予言勵諸胤系大抵人之賢不
肖初由一念之殊欲善則爲善欲惡則爲
惡勉旃厥後必使爲賢而不可甘爲不肖
念先世之時何如今日之事何如恒將祖

宗於心念一轉我爲子孫安忍棄毀之哉
如此則永保終吉與時世相爲悠久矣昔
者德裕謂壤平泉一木一石者非佳子弟
也况墳墓乎聿修無忝詩人之言在耳請
申之爲將來告

南坡黃翁配孺人范氏合葬墓誌銘
南坡黃翁既卒之二三年嗣子錦偕其弟鍾
自敘厥考事行請予銘予辭至再而請弗

月封焉樹焉亭臺隧道規制井然作永觀
立經久之計孝思之篤至矣盡矣夫君子
之垂統緒欲令繼續而行其如守成之難
何世之人知其爲難者多而能保其所難
者少欲以予言勵諸胤系大抵人之賢不
肖初由一念之殊欲善則爲善欲惡則爲
惡勉旃厥後必使爲賢而不可甘爲不肖
念先世之時何如今日之事何如恒將祖
宗於心念一轉我爲子孫安忍棄毀之哉
如此則永保終吉與時世相爲悠久矣昔
者德裕謂壞平泉一木一石者非佳子弟
也况墳墓乎聿修無忝詩人之言在耳請
申之爲將來告

南坡黃翁配孺人范氏合葬墓誌銘
南坡黃翁既卒之三年嗣子錦偕其弟鍾
自敘厥考事行請予銘予辭至再而請弗

玉邑大夫陝右王公謂其節行可旌母聞而辭寢翁木弱冠時頗嗜游奕母氏訓督甚嚴且謂黃氏宗祀惟爾是屬顧可非爲以墜厥宗耶翁感泣毅然勵志亢宗遂服勤商賈母念家世衰落以嗣守先業爲艱百計經畫以贍其家凡錢帛出入必謹記註歲久人莫敢欺自是家日用裕其創繼有如此者翁家居事無鉅細處之秩秩有

條不紊儉而不陋華而不豐待子弟多嚴厲下至僮僕輩聞其聲而畏之其家範有如此者翁性至孝養親食飲必躬親或臥病湯藥侍奉未嘗一日去左右其弟蚤世遺孤鞠如已出長爲婚娶治田宅不使失所其孝友有如此者與人同貨利寧厚於人而自取甚廉里人或空乏稱貸者周恤無所慳有弗能償者輒折其券不復校正

德嘉靖間值歲歉首倡出粟二百斛以賑鄉人縣大尹如江西王公山東郭公福建林公咸禮獎以嘉其樂善好施不一而足右族聞風者率願濟全活人甚衆人多德之其崇義有如此者翁行篤實介直不阿徇人意且果毅多籌畧嘗推長區賦不習武斷事既集而民不擾後先令長察其賢有事輒謀之而名譽益起用是歲賓鄉飲

辭而不赴遇例前職受而不冠其制行有如此者嗚呼翁之行義足以孚於里閭才識足以動乎鄉邑畏法循理終其身名不挂於訟牒信乎里人以善士目之是不可以見知於人人而傳諸遠耶翁生天順己卯六月十九日其卒嘉靖癸巳五月五日也壽七十有五配范氏勤儉內治孝行多淑德先公五年嘉靖丙戌卒壽七十有三

子男三人錦太學生娶王氏鏞娶潘氏鍾亦太學生娶予姪女孫氏女三長適同邑徐璘次適宋浩又次適華亭蔣克儉孫男四兆賢象賢錦出尚賢鏞出與賢鍾出皆聘仕族孫女五其一歸武學生倪灼餘尚幼俱許聘名家卜以嘉靖乙未季冬月八日公與范氏合葬於雲頂山麓之新阡銘曰

浦城東兮地惟良鑿黃壤兮築幽堂宅高人兮草木光無毀傷兮其永藏雲海迴兮山重岡孕靈秀兮有世芳

南溪沈公墓誌銘

嘉靖庚寅夏仲余適待

命於家內甥沈君瑞輩衰經垂泣持其姊壻曾君文霖狀乞銘於余余與南溪童稚交遊知公寔深乃拭淚按狀公姓沈氏諱

沂字宗淮南溪其別號也自始祖子才不
樂仕進積善雄貲著姓於移風里邨橋均
號大沈者以此云曾祖璘二祖賢考經號
存誠俱隱德不售配陸氏生子惟公公自
少岐嶷儀觀屹然頰頰霜威嚴毅莊重不
妄言笑凜乎不可犯多謀遠慮恒出人
表淵乎莫窺其際凡義當而勢當止者
又確乎不可奪甫出幼卽能代存誠公理

紛供役挺挺不羣人皆謂大沈族者南溪
也居家內外斬斬得正家法每晨興督減
獲各居業雖隆冬盛暑勿怠百務經畫種
種咸有程度尤篤於教子賣金買書之志
持之以終身延師家塾不少靳惜故子女
畏義勤慎胥謂庭訓所致長鄉稅數年不
吐不如人情允協時輩多下之先是存誠
公創業於祖居之北南溪惟勤嗇宏裕益

充厥緒亦可謂鄉閭豪傑矣性善飲亦有節凡會賓客或遇可喜事必破顏盡歡而止第心勞於內形勞於外且酣醇夜猶澡浴自是腹結癆癰發於背精神耗半旣而稍知休乃分拆二子與三子共居前疾未全愈促三子赴北省應試廼力疾綜理家事日侵風薄不顧愛居無何仍邁痢荏苒月餘竟弗起時長子瑞次珮訟繫於杭大

漸猶強項粥飲顧內子曰未畢吾事而還造化奈何嗚呼痛哉南溪據止於斯耶以公之精健壯實未卽歿以公之善飲食不自縱恣神頗頤未卽歿以公之心明行直食報于天未卽歿而乃年踰下壽心事未艾奄然長逝豈天豐其德而嗇其年抑將垂其休而裕於後耶三子玉立孫枝挺秀舊範宛然在目未必非天定也公生於成

化丁亥年十二月初十日卒於嘉靖戊子
八月二十三日享年六十有二配張氏子
三孟瑞聽選官娶陸氏仲珮郡從事娶王
氏季琦北太學生有志科目娶陸氏女二
長適鄉進士曾雨卽文霖次適平湖仕族
倪模孫男六曰袍習舉子業娶予姪女孫
氏曰禧聘朱氏曰祐曰尚幼皆瑞出曰
應奎曰應元未聘皆珮出孫女一琦出瑞
等十庚寅十二月二十六日新塋宅兆於
存誠公舊阡之東宜貽銘以志不朽銘曰
惟南溪公樹德惟恒追蹤古人祿不滿德
天眷攸存不于其身必于其子孫貞珉載
詞千古常新

峰溪外集

剪除土豪告示

直隸揚州府高郵州興化縣為剪除豪惡
以鎮靜餘黨事准本縣知縣孫 關切見
本縣地方荐罹災傷民俗釀成健訟或資
筆舌以成家或藉唆撥以立業善良者觸
若人而落其網羅奸豪者倚若人而張為
牙爪顧風土之薄惡實官司之罪愆近訪

得土豪徐某起家市井之徒援例千戶之
職身既叨榮理宜守分却廼構弟徐某徐
某同姪徐某徐某胡行亂道克惡萃
於一門虎噬狼貪暴橫誇於一邑官府積
年受其把持小民百端被其陵轢吞謀官
民田塲數千畝奸占良家子女五六人私
置樓船列軍器以泛駕白占官馬駭鄉里
以坐騎服舍則錦衣華屋敢違式以僭用

僕從多京軍場竈擅窩藏以使令徵錢債
屢威逼人命盜銀兩反打死平人取利盡
錙銖借倍屣而科什百圖產以方員逼人
離而家破散罪惡滔天權傾里邑肇前官
畏其聲勢而姑舍鉗制疊疊縱惡長奸罄
邑民視如虎狼而莫敢誰何在在吞冤飲
恨叢爾百里提封容此一豪跋扈是猶深
淵隱馭魚之獺叢藪伏捕雀之鷓假使鷓

獯不爲屏除魚雀何辜而被毒豪橫不爲
芟薙人民莫保其無虞故當職每自愧無
能祛惡以食粟而此豪敢反行用藥毒人
以圖財滅絕天理莫此爲甚寔罪孽之自
作匪官府之尋求今幸擒獲巨惡於積年
庶幾保綏災民於百里雖兒童走卒皆稱
快在天理人情爲得宜肆爾致告吾民不
過懲一警百凡爲其脅從於昔日者毋再

恐懼縱爲其畫策於今時者不必憂疑借
曰吹毛求疵連類及黨猶之城門失火殃
及于池魚楚國忘猿禍延于林木矣是豈
有官守者之體爲民父母者之心耶自今
以後果能改過自新者卽以良民待之雖
有前犯亦不追究如或仍蹈舊轍不改前
非萬一敗露法網難逃今而不爲切骨之
戒他日寧免噬臍之悔昔人有言曰螳螂

怒臂以奮勇而車輪一奔終爲齏粉螻蟻
結陣以張敵而馬足一蹴迅作塵灰斯言
曉諭吾民其深省之其熟慮之爲此合行
關請出給告示張掛等因准此擬合就行
爲此合行備給告示前去仰於人煙湊集
去處常川張掛曉諭凡民有則宜速改之
無則亦當加勉所有告示須至出給者
條開盱眙知縣高用明政績

學校

自到任以來時下學以嚴考校黜浮薄以
敦士風仍於季終給油散紙以資獎貧窘
勤苦者嘗見櫺星等門圯毀大成殿廡傾
頽深用以弗妥聖靈爲慮卽規畫經費鳩
工庀材而廟宇鼎新且謂學宮向方不利
易門面東樹青雲黃甲坊以翼衛左右自
後科不乏人而學校興矣

戶口

自到任以來蠲不急之務寬力役之征請糧以備賑濟榜諭以招流移值歲荒躬募富民以貸穀粟乃儲倉驗口支給而民蒙全活者萬計自是他方就食者日益復業而戶口增矣

盜賊

自到任以來芟鋤強梁禁察非法值年穀不登盜竊擾人者無虛夕則練習民兵以禦寇攘編立方甲以防剽掠自是境內寧謐夜戶不閉而盜賊息矣

詞訟

自到任以來簡易以臨民持平以折獄掃除煩苛捕擊狡猾民有入山運炭伐薪者緣地介泗州衛前此多爲豪軍鉗制卽告諭之以榜文間有強梁如故者毅然繩之

以法律自是軍衛懾其聲勢民庶懷其德
威政治清平案無滯獄而詞訟簡矣

賦役

自到任以來賦稅每先時以會計禁昔額
外科率之費徭役量丁力以差遣民有如
我父母之謠自是公家之賦役無虧民庶
之財力不匱而賦役稱平矣

田野

自到任以來躬率儉約勸務農桑修陂池
以潄蓄水利闢草萊以廣拓土田牛種缺
乏者募富民以借貸草場閒曠者召遊民
以耕食自是田有餘粟地無遺利而田野
闢矣

直隸揚州府高郵州興化縣知縣孫
爲緊急流賊攻圍城池事正德七年七
月十三日申時抄蒙

巡按直隸監察御史趙 案驗前事該

欽差巡撫右都御史張

欽差總制都御史陸 太監張 紀功御

史吳 詳審紀驗功次云案照先爲

前事已經備行 中都留守司呈取經

行地方及弔原文卷前來遵查強賊

劉三突遯定遠月日與該司分兵臨陣

生擒真正賊徒斬獲賊級顆數曾經呈

詳紀驗緣由通行回報去後今蒙前因

查得云惟恐不的行令叅隨官舍宋

雄施惠等并各擒斬地方巡山總小甲

李有得等前來覆審供結相同又經備

由回報去訖今又蒙案仰將獲功人員

分別等第叅稱明白回報一節照得署

正留守施忠宣力推誠出奇應變慮賊

則先分兵防禦實捍衛

陵寢之長城臨賊則親率軍剿擒卒保安
祖宗之重地功在國家理宜爵賞指揮同
知沈勛紀律嚴明勞勩茂著指揮武宣
陳灝張輔鎮撫趙泰軍人王雄驍勇獨
奮遇敵捐生各能自擒流賊一名舍餘
施釗勇敢出衆累立戰功自斬首級二
顆叅隨宋雄膂力絕人先鋒破敵自斬
賊哨首級一顆指揮趙遵李郁千戶袁

宏叅隨黃釗秦俊閻安王雄舍餘沈山
施惠軍人劉能爲首叅隨王箎趙輔張
見房偉李良薛銳丁相舍餘施福軍人
陳連李彪張通張玉山爲從俱能挺身
迎敵戮力同心共擒真正流賊一名舍
人唐遷軍人吳傑蹈厲奮發折衝效勞
各自斬首級一顆舍餘施雄梅璉施資
李俊謝錫高欽施惠軍人沈寬王銳劉

永泰爲首舍人施彪張隆吳介張福喬
昆王玉施山張泰劉昆爲從皆能臨陣
無怯乘勝取功各共斬首級一顆前項
官軍照例論功合行差次賞賚知縣楊
麓一城自守旣無帶甲之士可憑獨率
民兵而勇於拒敵萬賊突至又乏山河
之險可恃失守倉庫而力不能勝據律
有罪原情可矜今照前事擬合通行回

報爲此卑職今將覆勘過署正留守施
忠督率同出迎剿議派各官分布并獲
擒斬賊犯首級功次第緣由具呈
直隸揚州府同知孫 爲賑濟饑荒事
近准本府關蒙

欽差巡撫鳳陽等處地方都察院右都御
史叢 坐委當職督審泰州應賑饑民
驗口給散事完備細造冊繳報等因備

山溪外集 九
蒙移關准此除依蒙隨詣該州督審賑
給外所有合行禁約事宜擬合開諭爲
此出給告示前去仰該州并官倉門首
地方總小甲張掛曉諭官吏里老書手
饑戶人等知悉務照後開條約事宜遵
守敢有故違定行究問不恕

計開

一本州地方連遭非常水患災民

缺食日不聊生合當通行賑給
緣係錢糧不敷先儘極貧人戶
但恐積年里書欺公玩法頗過
者納賄受囑反行濫報貧困者
無錢買求多致隱遺奸弊肆出
惠與不均仰各知悉如有此等
里書許自首改正與免本罪如
或仍前作弊聽漏報極貧饑口

指實赴官口告從重究治

一里老書手等役務要率領饑口正身關領如有臨時逃亡者卽便從實報名在官以憑查扣不許乘機雇覓乞巧頂名冒領侵用違者許同里饑口告舉或訪察得出定行從重究問仍枷號示衆

一散賑糧銀每口一月給銀一錢五分或糧三斗係是定規但饑口數多銀糧不足該州官里老議作每月一錢通賑兩月庶饑口均沾其惠姑從衆議凡經手人役務須憫念饑口生死所繫毋得混將低銀抵換及插和糠粃稱兌行槩短少數目查訪得

出或被人告發定擬贓罪仍加倍追補

一散賑饑口該州先行拘集里老酌量地方遠近預定某日審放某里出給通知告示不許臨期遲悞致使寄居僦食得不償費反招嗟怨未便

一本州各鄉饑民離城寫遠者傍

近放糧去處人家遇夜及風雨務容宿歇居住不許趕逐及多勒宿食錢物違者許被害饑民徑自赴告連地方通行重治仍倍追給領

一聽賑饑民遇夜及風雨止宿人衆店舍不能容者許於寺觀廟宇廊房內安插僧道廟祝如有

趕逐露宿及光棍人等窺伺空
野無人剝卸衣服奪去糧銀致
令凍餓死者地方通行痛治問
罪仍令本犯買棺埋葬葬其饑口
自係凍餒或疾病死者歇家就
便報知地方火甲告官差人相
埋敢有無藉之徒乘機挾措者
定以誣賴人命坐罪決不輕貸

一賑濟銀兩俱係足色足數饑民
關領不無換錢易米但恐狡猾
經紀或入手轉移或大等重秤
反駕言銀低數多愚弄饑口情
實可惡如有此等忍心害理之
徒許地方及被害之人首告除
訪察得實定行重治枷號示衆
一里老遍年書手等役并富豪大

戶不許指以呈報饑口或替納
一應錢糧或負欠私債扣勒關
出糧銀致民不沾實惠違者許
饑民指實赴告重治追給

直隸揚州府同知孫 爲急修濬城池
以防禦地方事奉

欽差巡撫鳳陽等處地方都察院右都御
史叢 巡按直隸監察御史成 劄案

爲傳報賊情事備仰卑職前往儀真督
同各該掌印官整理糧草凡事關防禦
有益於軍民者亦要悉心訪究作急整
辦一而呈來查考等因除遵依外竊惟
防禦莫要于城池城池貴在于深固設
或城池卑隘無險可乘地方難保於無
虞卑職會同守備馬炅并督率儀真衛
縣各掌印官親詣城池相視得城外壕

池半多淤淺西門迤南盡廢爲田南門
至東門一帶軍民房屋率多占逼城垣
及看得該衛止是北門設有月城一座
其東西南三門俱無月城障蔽況各門
路接通衢兼以閘壩相間濠池水道四
面阻隔平時猶恐事出不測有警勢實
難爲隄防隨審據知因百戶姜楫執稱
前項濠墻久被軍民杜瑾等侵占弘治

十四年蒙

欽差都堂張

閱視行委本府同知葉元

會同儀真衛掌印官踏勘行令開溝爲
界保護城垣遷延至今未曾挑濬等情
爲照事恒廢於因循而成於豫備且儀
真南濱大江西通廬鳳實水陸喉襟之
地卽今賊艘上下往來竊恐京邊湖湘
軍士合併攻圍賊徒奮勇奔命萬一由

陸間道馳突東下若不豫爲處備城池
失險將何保障地方深爲可慮爲今之
計必須拓舊圖新庶幾周防地方不測
欲候呈詳至日舉行但恐緩不及事卑
職督同衛縣各掌印官查明侵占城濠
故道丈量界限及傍近西南城隅鹽所
舊閘議將蔽塞使濠水不得以瀉江開
濬各門壩道庶引水緣城以環遶仍各
懸橋以通往來遇警則掣橋阻絕但月
城缺建欲行葺置磚料卒難處辦已經
稟蒙南京工部磚廠主事周士英准將
節年揀退餘磚暫借公用其合用人夫
設若重加起倩不無動衆勞民量徹守
城火甲照依軍三民七仍各委官分工
修濬再照前項侵占城濠人犯合無行
令該縣姑候事寧之日徑自問報惟復

別有區處緣係急修濬城池以防禦地方事理未敢擅便擬合通行呈稟爲此今將前項修濬城池緣由理合具呈伏乞照詳明示奉行須至呈者

一爲緊急軍情事本年七月初三日酉時分據儀真縣手本該儀真守備都指揮僉事馬炅劄付奉

欽差南京守備太子太傅成國公朱 劄

付據守備九江指揮楊銳呈據瓜探軍人陳璽報稱江西吳城水次有湖廣等衛糧船交兌六月十六日江西內官領賊將船邀趕省城有安慶衛兌糧千戶陳宣不從就打四銅鎗百戶胡顯總旗梁能打八銅鎗將船盡趕去訖又有熊內官領船二百餘隻賊有二三千名在九江小孤彭澤涇江黃茅港柘磯遇船

邀捉差壯丁陳鑾瓜探止到吳城山不
得前進傳說賊至九江將府縣庫獄劫
放要印府衛官回避又稱賊徒要來南
京等情開報到臧案照先奉

欽差巡撫鳳陽等處地方都察院右都御

史叢 劄付并

巡按直隸監察御史成 案驗俱爲傳

報賊情事蒙委卑職同推官劉一正前

往儀真瓜洲一帶整理糧草及開凡事

關防禦有益於軍民者亦要悉心訪究

作急整辦一面呈來等因蒙此爲照卑

職於二十八日離淮二十九日到府初

一日會同知府蔣瑤議處次日隨至儀

真已經行令該縣整理間今據前因督

同儀真衛縣各掌印官并會守備馬昞

議得前項事情江上傳報聲息緊急畫

夜防守驚恐不寧查得儀真縣操備民壯北有八十一名快手五十名儀真衛守城守門守把梁口及巡江等項并選點舍餘尚不及八百之數雖經各官分布防禦緣前項軍民中間率多老弱不堪况軍不習戰民不知兵有名無實今照儀真前臨大江四通廬鳳實當南非水陸之衝比之瓜洲通州尤爲緊要但

官軍數少守禦不敷地方搖惑易動難安且九江相去不踰千里萬一前賊乘風順流而下旦夕可期欲候歸德衛指揮石堅僉事郭震統軍至日恐無以救目前之急爲今之計卑職欲將府屬附近地方調取興化縣快手四十名民壯二百名興化所軍二百名高郵州快手五十名民壯二百名高郵衛軍五百名

寶應縣快手二十名民壯一百名各將
該州縣查過預備賞功銀兩每人量給
銀三錢以資行糧之用軍衛亦在本處
州縣庫內支領前銀俱令自備鋒利器
械各委智勇能幹官二三員編成隊伍
統領刻期催督前來防守其興泰通州
海門亦係邊江州縣俱存留保守本處
城池泰州如臯并泰州一所仍聽推官

劉一正斟酌徑自呈請調用如此則邊
江有備而地方可保無虞矣惟復別賜
裁處緣係緊急軍情事理卑職未敢擅
便擬合通行呈稟爲此除行推官劉一
正徑自呈請及候查過糧草并應備事
宜各另行外今將前項緣由理合差人
具呈伏乞照詳定奪明示仍乞催督指
揮石堅等領兵前來防守施行須至呈

者

欽差提督北直隸屯田兼管糧草庄田子
粒山東按察司僉事孫 爲存恤廉官
妻子以勵風俗事據霸州申批古人有
云貧乏不能存此是好消息據申看得
工部侍郎張公歷官有聲持身無玷清
白可追乎古人名節不死於後世誠
昭代之名宦實鄉國之先賢妻子委係

寄食僦居有司理宜時加存恤仰州查
明本道無碍贓罰按月量給庶幾昭工
部清操於旣往抑以勵世俗士風於將
來其官倉支給常規申呈

撫按衙門議處定奪仍將本道給過數
目逐月申報以憑查考先具由申繳
一爲謀占軍地事據真定府經歷司呈
批本道遵奉

敕諭內開今特命爾專管北直隸屯田子
粒兼催督有司各該倉場糧草已有通
行案驗該司故違

敕諭擅改職銜泛視不相管攝僉名僉日
俱令吏胥代書深有乖於政體且

朝廷設官分職各有定分藩臬府縣綱紀
攸存該府知府謬爲大言自謂真定知
府抵過山東兩司矜誇寮屬吏民以市

直聲虛譽風聞 京師縉紳皆稱妄談

東萊云旦失色於堂暮傳笑於國竊謂
良有司恐不宜有此仰司查明代書吏
問擬應得罪名呈奪通行各屬知會程
資狀詞仍行管糧官問明詳報批呈先
繳

附錄

山西按察司僉事峯溪孫公墓志銘

武進唐順之撰

公諱璽字朝信嘉興平湖人也其先世徙自松江之華亭所居南有九峯東有盛溪因自號峰溪道人弘治辛酉舉浙江鄉試登正德戊辰進士除興化縣知縣四年陞松江府同知擬避籍疏改丁

內艱歸服除調揚州府四年陞南京
宗人府經歷丁外艱服除陞山東按察
司僉事提督京畿屯餉調雲南僉事坐
撫按構怨奏逮二司是時公已陞山西
叅議矣仍落僉事山西乙未 朝覲之
歲以老罷歸最前後仕途二十八年歸
十年爲嘉靖甲辰六月二日而卒距其
生成化甲午正月六日享年七十有一公

爲人寬厚持重內剛外和其所居官不
擇劇易不計利害智巧所避毅然任之
其有蹉跌亦不爲悔嘗言興利易而除
害難然除害所以興利也其在興化興
化豪徐某與其宗人交賂權貴猾賊邑
中邑中名之曰惡人殺言其人能殺人
也某以白衣入粟補興化所千戶綰所
印而所中諸世千戶反悒悒出某下不

敢喘令丞左右亦多爲某耳目者率常把令丞陰事令丞欲圖某懼不能制得反噬公始至某繡曾背持刺上謁公拒却之然亦未遽誦言罪某也而邑人亦無敢告言某者乃稍稍以輕罪笞其一二宗人以風指百姓百姓乃敢告某最後得其謀殺道姑攫財事遂密擒某繫獄考按盡得某與其宗人諸不法狀因

擊殺某而宗人坐死者數人邑中爲清民歌之曰惡人殺兮虎翼而飛殺惡人兮疋瘠我肥同時有江都豪余某亦坐殺人獄久不決上人以屬公公偵得其埋尸戶下鞠之囚駭伏上人益以公爲能有旌薦必先公公始至邑歲饑捐公廩代民輸自是孜孜民隱平徭清賦養老長孤時進邑中諸生誨之修身進業

之道居數年邑以治稱去之日邑人攀擁不得行而徐豪家獨銜公不已伺公去卽持金數千走京師賂閹官銳斬反其獄且中公奏下巡鹽張御史正德時諸閹專而銳尤有名所謂銳張也御史顧望窮索公過失數月不得則令公與豪家同囚繫困辱之時興化與其旁邑走唁公者日數十人揚之人與四方之

商於揚者莫不言孫令枉者御史勿聞也乃自爲書抵御史其語深切抉擿御史隱曲御史得書大慚惡竟引疾去後代者至踰年其事乃白已而爲揚州府同知揚興化所屬邑也始御史之勘徐獄也以屬淮安守某盱眙令某感受賂詭法巧詆公罪不克至是兩人爲他御史所論公又徃勘之罪不至罷卒從減

論後兩人愧謝公公絕口不道前事人
益以公爲長者同知臧清軍而軍解失
文據者例充軍時解人當坐者若干人
公請於上官以爲軍一人則解者二人
解者軍則別解者又四人矣牽連無已
時請限以一月首免別給文以行便上
官下其法所部郡邑爲例頃之淮揚飢
公徃賑泰州所活凡三萬餘人是時宸
濠反江西攻安慶公奉檄守儀真扼江
之衝捕儀賓之爲謀者與其黨十餘人
救旌其功會

武廟南巡淮安缺守公徃署事調發百出
而人不知疲 駕久次揚公歸治芻餉
時尚書蔣公瑤爲郡守公與協力調度
安集迄事罷蔣公名由此顯而公闇不
自居故人亦少知之嘗以僉事奉 命

文 皇莊草場地土清其地之爲奄戚
所漁奪者悉歸之民薊州銀冶盜嘯聚
千餘乘利據險爲患公攝兵備選能吏
馳上山寨榜示禍福各自縛詣公公罪
其首餘牒遣復業及徙雲南分巡洱海
道麗江土官介川蜀爭金沙江讐殺公
會勘其事土官以土金賂同勘者久伺
卒莫敢賂公由此解讐奉約束如故大

同經兩亂後卒伍驕悍少不當意輒負
怙跳躑以爲常公以山西僉事巡大同
盡心撫馭人賴安堵頃之吉囊入寇斬
首多以贊畫功 賜金公自爲令卽力
薰大豪及在薊州洱海大同倥偬盜賊
蠻夷反側兵戈之間而勘地土時則尤
以一文吏與貂璫肺腑爭氣力上下然
公處之未嘗不辨竟以不能俯仰故不

至大官在山西嘗衣豸衣見巡按巡按怒以爲慢已因考察中之遂以罷自知縣徙同知自同知徙經歷也亦坐不能曲事鄉大夫之有力者故卒爲所擠尤不喜通權貴人爲山東僉事時以屯田居京師久之永嘉張公爲相故交也同年桂公爲冢宰未嘗一私伺其門以是徃徃齟齬於世然公一未嘗以齟齬故

自悔至其清修之節則人亦不得而疵也總兵某嘗請問餽公寶帶鈎一公不啓封而還之雲南夷俗巡守行部輒有餽獻納則喜拒則疑且恚然公拒之卒無敢疑且恚者大理經歷以鄉人故潛置蒼石文書籠中假公移投入公亦潛還之不發其事平生自俸貲外無所取其俸貲亦多以散諸宗姻族卒之日篋

笥敝衣而已與人交婉婉樂易喜怒不
色見至其百折於世有不可奪者其性
然也居家事兄教授甚謹長姊寡而無
子迎歸養之禮事五十年奏

旌爲節婦性尤喜詩自罷歸居閒則詩益
多有雲山履歷稿藏於家公之先諱某
者居華亭國初被薦署縣學教諭事
至公之祖諱忠自華亭徙平湖者也父

諱軒封宗人府經歷母張氏贈宜人生
二子長爲伊王府教授公其次也配
張宜人先公卒呂涇野先生志其墓墓
在武原鄉盛溪祖塋至是公之葬合焉
葬之日卒之後一歲十二月十六日也
子一植舉進士爲刑部主事娶沈氏繼
娶葉氏女一壻爲禮部員外郎錢萱孫
四應辛仲辛叔辛季辛俱幼植始聞公

病脾疏請歸養歸踰年而公卒將葬植
來請銘余以未及識公固辭植曰余先
君則知子矣先君每誦子之文而得子
之爲人恨老不及見子此行蓋先君意
也因涕泣固請嗟乎余何足以辱公之
知而亦烏能有迹於公也哉於是按其
壻所爲狀與公所上張御史書論徐豪
事而次序之不敢增損焉懼失實也銘

曰

噬嗑腊肉或遇之毒終利用獄盤桓居
貞有膏其屯卒困於臀嗚呼古稱巧宦
四至九卿公豈其拙我則是銘

先公登第後與同年友唐文襄方棠陵
錢東畬諸公時有賡詠稿逸不存及正
德辛巳後植自童卯始知從先公請得
篇什手錄存之至嘉靖壬寅後植以刑
部主事再請告蒙

恩終養於家廼獲朝夕省侍遇有作者皆
得備錄以存通凡古詩曰言一首五七
言十二首律詩五七言百首絕句五七
言四十九首三五七言二首謹為校錄

後序

補

付之梓人近訪求故戚家又得七言古
詩一首五言律四首七言律六首則在
正德戊寅先公宦維揚時與諸寅僚雪
舟聯韻者文則

制策一道先公手以示植記一首存之手
冊而序一首說一首碑記一首墓誌銘
二首書雪舟聯韻後一首蓋亦求得之
故戚家書杜律趙註後者則家存杜刻
也其上書一首檢諸遺帙而公牘之在

令邑佐郡與僉臬山東督屯畿內者則
於故篋斷簡中得之錄為外集嗚呼先
公居嘗以忠信謙抑為訓戒不以言詞
功能矜飾於時是以所自著他及宦業
紀載不多槩見至其大節隱行不盡張
施今植所檢存遺稿於十之一二先公
亦必以為此一時之漫興與其應跡乎
爾梓之遺示後人非其意也願以植之
不肖幸承家學猥叨祿仕閭不知所樹

立以光前烈深切疚衷惟是為子若孫
者著存不忘乎心則雖片言隻字儼音
容之如在而先公心志嗜慾之所存或
於是乎得之庶幾不墜遺訓於萬一云
嗚呼歎報罔極興言感咽涕泣不知所
云予子若孫奉以家傳其世永寶之哉
萬曆三年乙亥穀雨日不肖男植百拜謹識

跋僉憲公雲山履歷後

先公自嘉靖丙戌以山東臬僉督屯北
畿戊子奉

命文地畿內自

三宮皇庄以及勲戚內監之

賜地皆躬自履畝歸其侵疆于民籍其濫
額者于官蓋十閱月而始竣事歲益公
帑銀七萬餘而民之得還故業者無筭

馬又嘗攝兵備于密雲榜諭礦寇首服者千餘僉議加擢迺以執持任怨弗悅於當路調僉滇臬逾三年臺臣特薦之尋擢少叅晉藩復以撫按相構詰波及省僚先公仍左遷晉臬於時蓋科第二十七餘年矣而三僉臬司官不踰五品其僉晉時巡大同當叛兵之餘朝夕震駭爲之外攘內戢鎮定多功而矢心操

畫則旣勞且瘁矣比於行臺撫景感時追憶歲之辛卯以越甲午周歷滇之南冀之北炎荒朔漠不啻萬里每于勝絕處即有題識各繪爲圖蓋不徒爲幽遐險絕之觀而其崎嶇仕路職勤封疆之寄實有不遑啓處者至于所寓興象悠然得于素養若昔人所謂平生踪跡半天下以登臨覽眺適情者父非先公圖

詠之意也此冊敬藏三十餘年不肖竊
祿兩京公餘時一奉展感慟罔極謹書
以付兒等示之永以世守云

隆慶己巳春日不肖男植百拜書於留省
官署式敬堂

臬僉孫公宦遊詩畫記

古之君子不苟出出必爲民其身所至
之處皆精思在焉雖歸田之餘迴念舊
遊歷歷在目若此卷者是已今之從政
者方其坐堂皇綰通綬已憮然里俗良
楛及地勢險易民情物變所同異退身
之日其忘之也宜矣蓋等之若傳舍甚
則目爲銅山金穴者我生也晚古之人

又安得見之而事之乎

峯溪孫先生宦於承平自南徼暨塞北三載之中跋涉萬餘里而不以為病他日使工為圖者分繪之曰我志我勞不敢自逸云爾此其志豈一刻忘斯民者耶先生傳簡肅公迄於文孫子彰孝廉代以德昌其家聲播朝野若食其報焉則先生之治績可知已後有覽此者其能無懽然敬仰兼致感於今昔之故歟余不及事先生幸獲與先生之文孫為姻婭將因是圖討論政事之實上太史氏以監諸有位母曰私諸家乘可矣

康熙己酉立冬前二日

同里後學曹溶頓首跋於菴齋

臬僉孫公宦遊詩畫記

有仕於此業去其官矣數十年後其民
尚謳吟思慕之不忘有之乎曰古有之
矣有仕於此業去其官矣數十年後思
其民因而思其山川草木亭臺風月之
勝命善繪者窮形取似復爲搦觚屬句
以寄其并州之思焉則古所未有也余
年友孫子彰述其

先僉憲公之臬於滇於晉也民至今謳吟
思慕之不忘而公亦不忍忘其民因出
此卷相示余展閱數四無論公用意之
厚也即詩歌字畫莊敬和雅靄然可掬
無一毫匆遽苟且之意作而歎曰至矣
哉盛德之在人者其即國僑之洵盤叔
子之峴首乎公一傳爲大司寇 簡肅
公又三傳乃爲今孝廉 子彰子彰以

方剛之年堅適軸之搯式于其家其子
弟扱箕撰履式于其國其鄉黨里塾讓
畊遜畔儼然先民之型焉

僉憲公視官猶家蒼萃其山川草木亭臺
風月之勝而紆爲丹青洒爲翰墨孝廉
公視家如官蒼萃其山川草木亭臺風
月之勝終年抱膝其嘯也歌視今之逐
逐榮利者又何如螺羸之二豪也哉吾

聞故家鉅族數傳而下寢熾寢昌其後
人必有敦樸之氣深長之思如魯公所
云高而不危滿而不溢者公侯之後殆
將復其始也耶經云毋念爾祖聿脩厥
德吾於孫氏見之矣

年家後學錢繼章頓首拜撰

臬僉孫公宦遊詩畫記

今人之于官猶傳舍也履其地稽厥戶
口曰某某富某某貧攫其金籍其帛歸
而探諸囊中曰是役也較勝爾若先輩
之于官直家居也家居則必爲之計深
遠其地里人物山川形勝必周諮而訪
度焉而况夫民情土俗之大所最關心
者乎

峰溪先生身閱閱之盛常承平之時宦轍
所至政蹟爛然即一山一水一草一木
靡不收拾錦囊傳爲後人佳話是其精
神所注無微不至夫風雲月露之章
丹青繪事之什特寓言焉耳昔人扁舟
載石琴鶴自隨清白之後于門昌大理
固不爽今文孫子彰年少掇科優游
泉石雖未大展其經綸而嘯傲烟霞等
身書卷固已氣吞雲夢八九其與
烈祖高風早已式穀似之矣

姻家後學寓村褚廷瑄頓首跋